



Ivanka Trump-i tebu
meina senzütsü

Basquiat-i yangluba noksa ka New York
nung sen million \$110.5 agi ayok

Angh-i Anil Madhav Dave mang ayimer



Anil Madhav Dave (file)

ajungbena asüba osang angashia kanga aoksar, ta Nagaland aser Arunachal Pradesh Angh, PB Acharya-i sangdong ka nung metetdaksü.

Anil Madhav Dave ji kanga dang nendaka agüja public tenzüker ka liasü aser pai tzümpung wazüka ayutsü atema mapa jenti inyaka aru. Pai alima tzümpung kümzüka ayutsü atema mapa inyakbatem teti bilemtetsü, ta PB Acharya-isa ashi.

Angh-isa, tasür kibong aser pa den anasatepa alir ajak den asüku lemsateper, ta sangdong nungsa metetdaksü.

Dimapur, May 19 (TYO): May 18, 2017 nü New Delhi nung Union Environment Minister Anil Madhav Dave kanga dang

BJP Nagaland-i Congress aitsür

Dimapur, May 19 (Agencies): BJP ya secular yimtenren telok ka lir aser "Sabka Sath, Sabka Vikas" omen kübok ajak asoshi terenlok mapa inyaker, saka Indian National Congress-i BJP indang tiyazü osangtem jembiba ajanga Nagaland nung alirtem mashileni anitsü meranger, ta Media Cell, BJP Nagaland-i sangdong ka nung metetdaksü.

Nagaland nung Khristantem reshikangshiba BJP-i khen danga ajangshia maru. BJP-i Nagaland state renloktsü atema dang temulung agüja mapa inyaker aser ibaji nübortem kuli agütsütsü, ta parnokisa metetdaksü.

AICC Secretary In-charge of Nagaland, Dr. Jaya Kumar-i Nagaland nung aser linük nung Congress teloki sorkar junga ketdang masüba indang nangzüko, anungji pai kodaser BJP dena tanga yimtenren teloktemi Nagaland sorkar kümra, "Land of Satan" akümsü ta shiteter, ta Media Cell sangdong nungsa shia lir.

Congress telok ya ochimashi ajak indang tetsü lir aser tesüba küm 50 tashi parnoki sorkar yimsü süa arudang, election nung ochimashi sen aser tiyazü osangtem ajanga dang nübortem mesüka aru, ta BJP Nagaland-isa metetdaksü.

BJP-i ochimashi anema nokdaker aser India nungi ochimashi agientsü atema inyaker. Yimtenren telok shingai India Linük Temzüng anema meinyaktetsü aser Linük Temzüng nung pei tamangba yimsü amangtetsü atema senso shia nem temeten agüja lir. Ano, India sorkari state kecha nung National Language "Hindi" amshitsü tetuyuba agüja mali, ta Media Cell sangdong nung shia lir.

BJP Nagaland ya 1991 küm tenzüka lir aser iba sülen nungi

Tashiyim mapaji lumiba aser sarasadem agi akoktsüla

Dimapur, May 19 (TYO) : Nagaland nung election mapang telok balalai tashiyim amshir aser ibaji mekotteter, anungji komaser tashiyim mapatemji akoktsü ta tanü Hokolbar nü ABAM-i ayongba Clean Election senden Tzurangkong nung aliba sentong nung shisalemsatepdang, "tashiyim mapaji tashiyim agi akoktsü memerangtsüla saka lumiba aser sarasadem agi koktsü merangtsüla," ta shisalen sayurtemi ashi.

jajaba sentong ama election mapang arogo aser yimteni ayongzüka agitsüla ta shisalen sayurtemi ashi

Iba ABAM Clean Election sentong nung yimten yimsüsürtem aser arogo tenzüker den Tsurangkong nung Ao arogo 10 nungi nisung 77 shi arua Chungtiayimsen Baptist Arogo nung Hokolbar nü agiogo.

Iba sentong nung shisalen sayurtemji Tir Yimiyim yimozülur Wb. K. Temjen Jamir aser Wb. Apok Jamir, Secretary, Literature & Education, ABAM na liasu.

Shisalen sayurtem ajanga asen lima nung Tsüngrem tsübuba, Sobaliba metetba, nübur meimba, tatar senden nung keno benoka jembitetba aser pei taküm azüoka litetba

DUCCF aser GB Union-i anir Dimapur nung clean election atema inyaksü

Dimapur, May 19 (TYO): Clean Election Campaign atema Hokolbarnü Dimapur Urban Colony Chairmen Federation (DUCCF) aser GB Union Dimapur mezüngbuba coordination senden amen.

Sendenji Lotha Hoho Ki nung amen aser Dimapur Deputy Commissioner, Kesonyu Yhome-i tajungshi o jembia.

Election indang maparen ya kanga dang tezüpa liasü aser nisungtemi pei mulungba nem nem vote agüja aru, saka tanü public-i election maparen kanga tasak kümdaktsüogo aser tim masüba mapa jenti inyaker, ta Kesonyu Yhome-i tanü o jembidang ashi.

"Clean Election campaign ajanga election nung ochimashi lir ta sayur aser asenoki ibaji merüktetsü mapang tongogo" ta DC-isa aser paisa Clean Election campaign ya tesem kar nungbo takok ngua agidar ta shisem.

Asenoki election nung asen vote ji senti ta mebileni amshir. Anungji, asenok election nung tim masüba mapa inyakba sülen

yimten yimsüsürtem dak tai metongloktsütsüla, ta paisa metetdaksü.

Sorkari shimtetba GB temi election mapang nüboyima senzüba aser yimtenren mapa inyakbaji tim masü ta DC-isa aser pai senden nung adenertem dang election tongmelang kümdaktsütsü atema inyakang ta ayongzüker.

Dimapur Municipal Council CEO, Moa Sangtam-ia o jembidang, mezüngbuba nung public tangatetba melenshitsüla aser ibaji kija shia nung adoktsüla, ta ashi.

DUCCF aser GBs temi Clean Election Campaign tenzüka atema Moa Sangtam-i tenüngsang agüja ashidang, loktii shilem agibaji kanga tongtipang aser iba alizüng tongtetsü atema ajak külemi teka amteper inyaksüla, ta ayongzüker.

Tanü senden nung joint forum-i mapa telatet ka tsüngda colonies/ municipal areas nung inyaksü atema action plan ka yanglutsü lemtet.

Iba maparen atema Core group ka tentetsü aser iba nung colony

council members, GBs, tetsür aser lanur lennirtem, pastor/ arogo lennir aser kiyong nung shisakartem adentsü aser iba telok jagi pei pei kiyong nung clean election maparen aser election nung tim masüba inyakyimtem aziöktsü.

Iba telok jagi kiyong nung lanur, tetsür aser tetsütem den ajuruteptsü aser parnok den election nung ochimashi indang onüktem lemsateptsü aser clean election tenangzüka agitsü atema ayongzütsü.

Tanü senden nungsa clean election dak sendakba colony general meeting alitsü aser iba nung kilen shia nungi shilem agitsü aser Clean election alema inyakerem kiyonger merenshiba den ano tangalen nungi arurtemi/ proxy voters anema mapa inyaksü ta tebilemba lemsatep.

Forum-isa Dimapur Christan Pastors Fellowship aser municipal area tem nung aliba arogo tem yari ajanga taküm July/August ita pledged stickers adoktsü aser ibaji kilen shia nung alemtsü, ta tanü senden nung telemtetba agi.

UP nung Dalit kibong 180-i Buddhist yimsü agizük

Lucknow, May 19 (Agencies): Uttar Pradesh kübok Rupdi, Egri aser Kapurpur yimsüing nungi kibong 180 shi kati ayong ka nung Hindu süngyangukem endoker Buddhist tamangba yimsü agizükogo.

Parnoki ashiba agi, süngyangukem tzu nung endokba jagi Hinduism toktsüba aser Buddhism agizükba tamaitü sayur.

Police-i Bhim Army anema mapa inyakba aser Dalit activist telok tenüng menüktsütsü atema

mapa inyakba anema parnoki iba telemtetba agi, ta Buddhist yimsü agizükertem osangbener dang ashi.

"Police-i onok dak asaa merenshir. Jenjang temaba nung alirtemi Dalit nung dak tim mesüi inyangshiba atema Bhim Army tenzüker Chandrashekhar Azad-i ola adok saka police-i pa dak tenük yoka mapa inyaker" ta Kapurpur yimsüing nung alir Deepak-i ashi.

Yimdaklirtemi police dang Dalit nung lendongbang nung lir ta teyari meshia shidi zülü, saka ano

külen police-ibo osang balaka metetdaksüogo.

"Onoki iba mapa inyakba osang kecha mangazük aser tamangba yimsü amangtsübaji pei mulung lir. Tamangba yimsü melenba ajanga parnoki ozüng alema inyakba mapatem nungi jenbuttsü ta bilemer lira, Indian Penal Code ji ajak atema kasa ta ni parnok dang metetdaksür" ta Saharanpur SSP, Subhash Chandra Dubey-i osangbener dang ashi.

(Maneni tapak 11 nung...)

Tashiyim amshiba mapa koktetsü atema Mahatma Gandhii India nüchiso asoshi raraba ama ochi aser "Non Violence" ajanga raratsüla. Iba amaji tashiyim mapatem anema nübortem tesem ka nung adenshia lumia sarasademba sentong aser lokti tetsüng agi

nisung shimtetra, government tajung asütsü aser terenlok kechisa arutsü tim ajak arua nübur anisungzüker angutsü ta parnokisa shia liasu.

Election ya vote yoka achiba mapang masü saka tarutsu putu asoshi jenjang yanglutsüba mapang, anungji lanur nükla yur asenoki election agira sen yong ochi memelenteptsu saka tarutsu lanur asoshi lenmang sadema lapoka yutsür asütsü ta shia liasu.

Tanü asen lima terenlok kecha makaba ya aseni tebok asüngtsü dang bilemba yong lir. Aji oda, pei temeten senmang yoka chir asenok ola madokteterji asensasa asen rokonger, anungji tang nungibo tebok asüngtsü asoshi dang mebileni alima koda asüning nübur ajak anisungzüka alitsü ta

bilema election nung shilem agitsüla ta shisalen sayurtemi ajangshia liasu.

"Tongtipangsa, tanü Tsüngrem tenzükerem ochi o jembia lenirtem dang nenoki aibeleni inyakba ajanga asen lima shirangerar joko ochi shia inyakang," ta tasü itta ashitsüla ta akang akanga shia liasü.

O lemsatep mapang election merukteta magiba ya candidate tai masü saka asenok nüburtem tai, anungji nüburi angateta sen magitsü aser senso mesüra tsükong candidate meshimi shiba temsüa lir ta ajiteter iba lenirji ochishia shimtetdi, ta jembia.

Tanü Khristan state ka nung Clean Election otsü jembibaya anasatiba agi Assam nung dang taaktsü mapa ta kanga tesasa o

jembia, joko iba otsü yabo tarutsü mapang mejembitsüsa tamanger tajung ka ama joko nisung shiai pei taküm khuli jangja jangja kümzüka yua, aruya aliba election ya agitsüla aser alima yamaisa ora Tsüngrem tenzüker takotet karbo nüburi shimtettsüla ta jembia liasü. Nagaland nung party tasen tenzüka indang shisalemsatepdang, kümshia party tasen adoker saka kasa nisungtemang asürji inyakyim kasa dang aoer; jangramatem, anungji lanur tajungtemi party tasen ka yanglua kong asen tamanger khuli mesamai alima terenlok bener arutsü akok, iba tangatetba nung party ji yanglura asen lima tarutsü nung ajangtsü ta sensak asem.

(Maneni tapak 11 nung...)

DC Office Kohima-i ketdangsertem den tepila sentong agi



May 18, 2017 nü DC Conference hall, Kohima nung Kohima District Administration-i ayonga Administrative ketdangsertem den tepila sentong agidang tangokba noksa nung angur.

Kohima, May 19 (TYO): Kohima District Administration-i ADC Kohima, Lithrongla Tongpi, SDO (C) Sadar Kethosituo Sekhose, SDO (C) Judicial Neilezo Tep, SDO (C) Estt. Neikesono Kevichusa, SDO (C) Jakhama S. Athsangla, SDO (C) Sechu T Lanusenla Lkr aser EAC Sadar Kohima, Thejavizo Nakhro nung densema mapa nungi anisüngzüker Administrative

ketdangsertem atema May 18, 2017 nü DC conference hall, Kohima nung tepila sentong tajung ka ayongzüka katsüogo, ta ketdangsertem osang ka ajanga metetdaksü.

Iba sentong nung jembidang Kohima Deputy Commissioner, Rajesh Soundararajan, IAS-i mapa nungi anisüngzüker ketdangsertem dang parnok kümsük mapang nung amalitepa inyakba aser district atema mapa

tajung balala inyaktsüba asoshi parnok dang pelaba lemsatep.

DC-isa tassenpur ketdangsertema pelaa agizüka liasü.

Iba sentong ya ADC tassenba, T. Kiusumong Tikhir leniba nung agi aser Accountant DC Office, Kohima, Neibu Angami, Hd. DB Kohima, Keneilezo aser SDPO (South) Kohima, Atou Zumvu nungeria o tatsütsü jembia liasü.

May 20 nü state nung Anti-terrorism Day ayonga amungtsü

Kohima, May 19 (TYO): Lanurtem kiralongraba nungi jenbua lidaktsütsü aser ozüng alema inyakba nungi pilaa lidaktsütsü nükjidong nung kümshia May 21 nü Anti-Terrorism Day mungyonga arur, saka takümbo May 21 anogo ya Deobar anogo lir aser state sorkar office tem sodi anogo asübayong state sorkari iba

anogomung ya May 20, 2017 nü ang amungtsü lemtetogo.

May 20 nikongdang 1:30 ako nungi Secretariat Conference Hall, Kohima nung iba anogomung sentong nung tenangzüka sentonga agitsü.

Iba dak sendakba nung Nagaland Civil Secretariat nung ketdangsertem aser staff ajak dang tenangzüka agiba sentong

nung shilem agia adentsü mepishia metetdaksüogo.

Iba dak alia Additional Chief Secretary & Home Commissioner Nagaland, Temjen Toy, IAS-i May 19, 2017 nü metetdaksüba ama sorkar office ajak, public sector tem aser tanga rejutem nunga tenangzüka sentong agitsü mepishia metetdaksüogo.

Nagaland Adolescent Girls' Club tetushi agütsüba sentong agi

Kohima, may 19 (TYO): May 17, 2017 nü Oking Christian School, Kohima nung Nagaland State Social Welfare Board (NSSWB) leniba kübok Nagaland Adolescent Girls' Club (NAGC)-i "what you are looking for is not on the outside, it is within you" omen nung ajemdaker tetushi agütsüba sentong ka agiogo.

Iba sentong nung kaketshir 150 den teacher-in-charge aden aser sentong nung school balala nungi kaketshir 93 nem HSLC aser HSSLC exam 2017 nung takok anguba atema NAGC certificate agütsü.

Lokti pelaa agizükba o jembidang Secretary NSSWB & Mission Director SRCW,

Daisy Mezhür-i tatidang nung takok angur kaketshir ajak nem tenüngsang agütsü.

Laisa tetsürtem dang, nükjidong tulu ayutsüla, kechiyong tatem nungbo jenjang tajung alangtetsü, ta ayongzü.

Ano NSSWB Chairperson, Bano Vinito Chishi-ia "The Road to Success" onük nung jembidang kaketshirtem dang Tsüngrem dak sottsü aser Tsüngrem tsübütsü ajungshi.

Laisa, Tsüngrem meteta tsübuba dak akala taküm nung tuluba mali, aser yamaji taküm libaliroba ajanga taküm tetezü keta litettsü, ta metetdaksü.

Laisa, maongkaji timtem arema meranga inyakerkem

atema lir, sen aser rongsenji tang arutsü aser aotsü, saka shisaliok ajangabo nü nem tashi agütsütsü, ta ashi.

Laisa, takokji pei taküm nung Tsüngrem sentong ataloktsüba lir, ta shisem.

Iba sentong ya Ruovinuo Kiewhuo leniba nung agi aser Oking Christian School Administrator, Zhopota Rhakho-i tetenzük sarasadema liasü.

Ano Dancers United teloki "Me without you" ken nung tsüngsanga liasü aser NAGC Mewi School den NAGC Oking Christian School-i temeja ken ka aten aser Medochiinuo Chielie-i tepela anküp o jembia liasü.



Dimapur, May 19, 2017: Department of Hotel Management, The Global Open University, Nagaland-i Sodzulhou Village, Dimapur atema "Art of Cooking" indang anogo ka workshop ayonga katsüba sentong nung shilem agirtem aser tesayurtem külemi tangokba noksa nung angur.

Alverge Academics and Careers

A subsidiary unit of Alverge Services - Dimapur

Free counseling for 2017-18 for the below listed courses
BE/B.Tech, MBBS, BDS, Nursing, B.Pharm, BCA, MCA, BBA, MBA, BSc/BCom(all branches), Diploma, Lateral entry into Engineering

Asen lima higher studies azüngtsü busitepdang sen aser nupo kanga indoker, aser tia maker karobo memeteba nisung nem kulakokdaksüer. Iba tia ajiteta **ALVERGE ACADEMICS AND CAREERS** koba Dimapur nung **ALVERGE SERVICES** indang education counseling branch ka lir, iba ajanga tanurtem admission den sendakba nung teyari agutsür.

Contact: 8011335158 / 7085270049 / 7005139093

National Pension System sangdong

Mokokchung, May 19 ta tanü Sub-Divisional Education Officer, Mokokchung, R. Imsusenla-ialir, Sub-Divisional Education Officer, Mokokchung nung inyaker ajak dang NSDL e-governance infrastructure limited nem "Self Certification - FATCA/CRS Declaration Form" agütsütsü metetdaksür, ta sangdong nungsa shia lir.

3buba YWO mungdang mungogo



May 19, 2017 nü Chessore yimdak 3buba Yimchunger Women Organization General Conference nung ENWO Advisor, Naythei Panguy-i jembiba noksa nung angur.

Dimapur, May 19 (TYO): aser village council temi May 19, 2017 nü Chessore yimdak 3buba Yimchunger Women Orgnization (YWO) lokti mungdang takok ngua mungogo; iba sentong nung tongti tesemdangerji Eastern Naga Women Organization Advisor, Naythei Panguy aser tetushi tejaokerji, Additional Deputy Commissioner, Satakha, Athrila liasü.

Tongti tesemdanger o jembidang Eastern Naga Women Organization (ENWO) Advisor, Naythei Panguy-i, lokti nung lenirtem, ketdangsertem aser nungtugu nisung aika adokdaksüba nung tetsürtemi shilem tajung agiba atema pelaba lemsatep.

Laishiba nungi tekong ka nung ajemdaker lai, tarutsü anogotem ajungtsü atema tang rongdak süa temeim aser tangatetba tajung nüngdaker, ta metetdaksü.

"Asenoki Tsüngrem tsüngdang ajemalushidi aser lokti nung yimjung aser tesünep atema tatishitsü tajung sayur kümdi," ta laisa ayongzü.

Ano tesem nung teburtem aser village council temi tetsürtem nungitba atema lai teburtem dang pelaba lemsatepba den külemi iba sentong takok ngua akaba atema executive züngsemtem nem tenüngsang agütsü.

Iba sentong ya Yimchungeru Arihako, Pungro Unit Tir, Suzana Yimchunger leniba nung agi, Alula Z. Thsanso-i Tir o jembia aser Kaisa Akiu-i tepela anküp o jembia liasü.

Ano tetushi tejaoker Additional Deputy Commissioner, Sathaka, Athrila aser Yimchunger Tribal Council Tir, Keozih natia o jembia liasü.

Kasa sentong nungsa Yimchungeru Arihako Shamator Town teloki sobaliba ken ka ajanga shilem agi, Yimchunger Women Organization Shamator Unit executive züngsemtemi 'Human Trafficking' saya ka ajanga shilem agia liasü.



New Delhi, May 19, 2017: Hokolbarnü New Delhi nung Manipur Chief Minister, N. Biren Singh-i Minister of State for Development of North Eastern Region (I/C), Prime Minister's Office, Personnel, Public Grievances & Pensions, Atomic Energy & Space, Dr. Jitendra Singh ajurua senden amenba noksa nung angur.

India nung apo talangtiba ya CISF temi anüktsü südi

Guwahati, May 19 (Agencies): India nung talangtiba aser Asia nung talangtiba rongnung tanabuba jenjang nung aliba Dhola-Sadiya apo ya India Ato Kelonser, Narendra Modi-i May 26 nung sayatsü lir aser Assam sorkari Union Ministry of Road Transport & Highways dang teyari meshiba sülen iba apo ya Central Industrial Security Force (CISF) temi anüktsü südi.

Assam indang Home department ajanga nungdakba tem metedaktsüba sülen Assam indang Public Work Department (NH works) ajanga sen crore 39.88 indang tatembangba proposal ya Centre nem agütsü.

"Assam police ketdangsertem, CISF, PWD (NH works), Assam aser Navyuga Engineering Company Limited indang project manager külemi lungjemer iba apo atema survey ka agiogo," ta Assam PWD (NH works) indang Executive

engineer, Jatin Nath-i ashi.

"Shift ka nung mitkar 200 bo iba apo nüka alitsüla. Anungji Dhola-Sadiya apo indang north bank nung ali bigha 30 nung CISF battalion ka lidaktsütsü asoshi proposal ka yanglu," ta Nath-isa ashi.

Parnoki centre sorkar nem agüja aliba project nung iba apo anükertem asoshi talitsü ki, office tem, quarter, parade ground aser trauma centre densema lir, ta paisa ashi. "Iba apo anüktsü asoshi CISF nem 'night-vision goggles, CCTV, control room, motor boat, drone aser gari balala agütsütsü inokja lir. Metre 200 shia mobile checkpoint kaka alitsü aser apo anütsü tatem nung permanent checkpoint kaka alitsü," ta Nath-isa shisem.

Kilometre 9.16 talang apo nung ya tesangwa inoktsü, senzüsemponeer kümzüka alitsü asoshi highway patrol, lenmang tasazük apir emergency number tem sayutsü sentong lir, ta Union Ministry of Road

Transport & Highways indang Regional officer, Paban Kumar-ia osangbener dang ashi.

Iba apo nung tesangwa inokba nung sen crore 30 indoktsü saka Centre sorkari iba proposal anu magizüki lir, ta osang ajanga ashi.

Chief Minister totuyuba nung ajemdaker Dispur nung Home department aser PWD tsüngta senden aiben mener iba proposal ya agütsü. Tang bo iba apo ya Assam police temi anüker aser Centre-i iba anüktsü mapa CISF nem magütsü tashi parnoki nüka alitsü.

Iba apo ya China aser India arrtsü nungi kilometre 100 majung bilar lir aser Anini tsütsü-i mitkar tem aoba nung anogo ka-sür tesadang agi tekeraba nung oa atongtsü. Arunachal Pradesh indang Dibang Valley kübok Anini ya district headquarter tatembangba lir aser iba tesem ya India aser China arrtsü anüdoklen lir.

Moreh anasa IED ka apok, mitkar pezü yiru

Imphal, May 19 (Agencies): Tanü Chandel district, Manipur nung telungpur temi IED ka pokdaktsüba lendong nung Manipur police commando pezü yiruogo aser par pezü nungi ana bo kanga mejungi yiru.

Iba lendong ya anüngdang 12:45 ako meta Imphal-Moreh lenmang, arrtsü nung aliba Moreh jila nungi kilometre 10-shi bilar atalok. Police convoy ya Kwatha Khunou Lamkhai ajanga Imphal-leni aorba liasü, ta police ajanga ashi.

Lendong atalokba sülen iba

tesem-i police reinforcement yok. Kanga mejungi yirur alir police tem ya IAF chopper ajanga mozü agüja anepalutsü asoshi Imphal-i anir ao, ta police lenir kati ashi.

Tain ita kisüng nung telungpurtemi mitkartem dak amakba ya tain aki tanaben lir. May 9 nunga telungpur temi IED ka bokdaktsüba mapang Territorial Army (TA) ana bokset. Territorial Army-tem ya Tengenoupal district kübok Lokchao tesem nung lenmang lapoka duty aoba mapang iba lendong ataloka liasü.



Gangtok (Sikkim), May 19, 2017: Hokolbarnü Gangtok nung Sikkim Angh, Shrinivas Patil-i Union Home Minister, Rajnath Singh agizükba noksa nung angur. Union Home Minister-i anogo asemnü atema Sikkim semdang, aser iba mapang nung pai India-China arrtsülen aliba state pongu- Jammu & Kashmir, Himachal Pradesh, Uttarakhand, Sikkim aser Arunachal Pradesh state tem nungi Chief Minister tem ayonga senden ka mena India-China arrtsü dak sendakba onüktem lemteptsü. Kasa senden nung Border Area Development Programme aser state tem o ITBP tsüngda amalitepa inyakba onüktema jembitsü.

India nung railway station temerüktiba 10 rongnung Assam lir

Guwahati, May 19 (Agencise): Northeast Frontier Railway (NFR) zone kübok Assam indang Rangiya Railway Station ya India nung 'A' category railway station rongnung temeriktiba jenjang 7 nung lir. Taoba küm iba railway

station ya jenjang 78buba nung liasü.

Saka NFR ya küm ka tsüngta nung jenjang asem tashi ajemzüka alua linük nung mümeriktiba kümogo. NFR zone nung Silchar ya linük nung station 407 aliba nungi jenjang

392buba nung lir.

Iba survey ajanga bushitetba agi Northeast nung railway station tulutiba, Guwahati railway station ya taoba küm jenjang 353buba nung liasü saka 2017 nung iba station ya temerik rongnung jenjang 37buba nung lir.

Temeten anema inyakba osang agütsütsüla: NHRC

Guwahati, May 19 (Agencies): National Human Rights Commission (NHRC) Chairperson, Justice HL Dattu-i, Northeast tesem nung tepetzük tia nung alirtem dak sendakba meimchir temeten anema inyakba osangtem commission nem metedaktsütsüla, ta ashi.

Guwahati nung anogo ananü camp nung adentsü aser Assam o Meghalaya na nung ken o tem anagadangtsü atema Dattu tang yimti nung lir aser pai, Centre indang scheme tem junga inyaktsüla, koba ajanga tepetzük tia nung alirtem, temeten anema meinyaktsü, ta ashi.

Manjuli nung lanur kati pa adianu tasümgang cycle nung bener aoba tatalokba dak sendakba nung osangbenertemi asüngdangba ka langzüdang, commission-i item ama tatalokbatem meteta dang lir, aser item ama osangtemji commission nem metedaktsütsüla, ta Dattu-i ashi.

"Item ama ken o ji

commission-i agir, anungji item osangji commission nem metedaktsütsüla," ta Dattu-i ashi.

Iba camp mezüngbuba anogo nung commission-i division bench ana kübok ken o 43 angadanga liasü.

"Item nisungtem ajangzüktsü atema nungdaka aliba ken o aika angadangogo. Tepetzük tia nung aliurtem danga item ama ken o agütsütsü onoki jaokogo," ta paisa ashi.

Brihostibarnü Chakmas nung arem temeten, tanurtem mapa inyakdaktsüba, tetsür chanutem shibelenba, tribal tetsür chanu ka tashiyim amshia raksatsüba aser police ket nung lia nisung asüba densema ken o aika angadanga liasü.

Meimchir temeten anema inyakba dak sendakba ken o tem nung commission-i tiyongtsüi aita inyakba ajanga Assam aser Meghalaya sorkartemi takoksa angur kibongtem nem senotsü teyari lakh 259.5 agütsütsüsa kümogo.



Guwahati (Assam), May 19, 2017: Hokolbarnü Guwahati nung Assam Police nung Special Director General, Kula Saikia-i Khanapara field nung osangbenertem den May 26, 2017 nü Ato kilonser, Narendra Modi-i NDA sorkar küm asem ajungba dak sendakba nung Guwahati semdangtsü aliba atema security renemshiba osang lemsatepba noksa nung angur.



TIR YIMYIM YIMOBILEM (EDITORIAL)

DIMAPUR SATURDAY, MAY 20, 2017

TAILA TEMEIM SAYURTEM

Joko asen lima nung election mapang atongerji ajak dak temeim keta ali amato akümtsü. Tang yabo shirangertema anepalur alitsü aser school nung tanurtem admission agitsü asoshia teyarir angutsü. Aji oda, tekolak kisung menüa alinunga election-i inürtemi mozü kidangi bener odi asütsü. Moatsü, Tsüngremmong aser Christmas nunga aon alitsübo memeshiyonga agütsütsü. Aji oda, bendanglen alirtema taoba küm pezü mazüangi aliba agi yimtaki kenüa moutet süidaktsüba to tangbo yimtsüang meima yimtaki opet aotsü aser kinunger pilar alirtem to anasai bener arutsü aser tangartem dena kinunger kümer jungteptsü. Iba amaji nisung dak temeim yamai ali na ta bilemstsüsa election piyong meimtsü. Ajisüaka, parnok to election temli mali akümtsü aser pa mesüra la to taruba küm pezü mangutsü. Joko, election temerbo cancer agi shirangyonga mangashi atemer toktsütsü. Admission agitsüa mangutsü aser benjong amongtsü asoshi shijep tilaka agütsür a mali kumadoktsü. Aji oda, election mapang yamato nisung ajak kinunger kümer longsuba to election temerbo kijalir kumadoker. Iba amaji, joko, küm aika asenok ya taila temeim sayurtem nem ashiokdakja arur. Temeim yabo ayoktsü aser alitsü akokba oset ka masü. Temeim yabo angati dang agütsür anungji temeim mapa inyakba melen langka meyipa angutsü meimlar. Aji oda, temeim maliba nisung kati temeim lir ama sayutsübaji tasak. Ajisüaka, pa mesüra la meyipa angutsü tebilemba nung temeimbo memeimer ser nung kanga meimer amai sayur. Iba ama taila temeim sayuba mapangji election ya lir. Election mapangbo tular tema tilartem ki tonga aotsü aser aobaji dang masü teka tazüang mangutsü. Ajisüaka, election temerbo parnok kidang jagi toutettsüla masü, gate shibanga yur maitdaktsütsü. Iba ama taila temeim sayurtem nungi kanga kumdanga alitsübaji nübortem asoshi kanga tenüngdaktsü kümogo. Akhi mapangbo timtema aliyonga kenüa marudang aser mesemdang yur election mapangbo anogo nung kenbo jembir aser hopta nung kenbo arudanger ta asübaji tapibo masü. Aji oda, nübortemi angatettsübaji election mapang tangar agi dena kinunger kümer na bushitsüsa akümiba jagi na ya kanga tongtibang senso ka ta sayur. Asenoki asen taküm ya kechasütsüa masüa ta bilemer aser yimten aser lokti nung shilem magir. Ajisüaka, election maparen nungbo tular - tilar aser takar tular kecha mali, ajak kasadang, ajak vote kaka dang lir. Ibayongji, memeimnyüonga meimer ama sayua mesüzüktsü arur mesüra alizüker. Nisung ajaki iba jenjang (value) ji meteta taila temeim sayur nem memesüzükdaktsütsü merangtsüla. Küm pongo nung ken election arur aser election aru shia taila temeim sayur nem asenok mesüzükdaktsüba agi taküm piyong timtema alir. Aji oda, taila sayur nem election pezü tashi nung mesüzükdaktsüra mesüra pei vote yokra, iba jagi küm metsü (20) asenok kecha ola madoktet parnok kübok alitsüsa akümer. Nisung ka arishi nung küm metsüji talangka, idangji tantsür tambur akümtsü. Iba amaji asenok ya taila temeim sayua election-i aiertem aser taila temeim sayua election mapang nübo ayimertem lar kümer alir. Asenoka sowarbo masü aser tanur a masü, anungji joko taila temeim sayurtem nembo ojang mesüshidaktsütsüla. Ano, temenünütsüka aser temulung ashitsü kaji, asenok nübortem meyong sen ayadana yur election-i aier aser iba senji amshia asenok mesüzüktsü meranger. Ibajibo mezüngmeshiba mapa tulu asütsü. Ajisüaka, asenoki tanü tashibo shibai taila temeim kanga junga sayutetter, shibai pei taküma mapayui mashimashi senzür, shibai yi ajemer, shibai public sen teimba adjust süa agitetter, parnok jagi dang junga yimsüsütettsü ta angatetba ama parnokjiang yarir. Iba jagi government-ji asenok jakla mesük kumadoker. Aji oda, asenoka joko election 12 ben tashi agia arur asünungji, tang nungibo taila temeim o shitakba temeim na bendangteta peitemeten shitak amshia election nung shilem agitsüla.

OLEMSABANG

TARUBA ELECTION ATEMA JUNGA BILEMDANGA
ATATSÜ ATEMA AO KIN DEN KÜ TEBILEMBA KAR:

Late. T. Nokpang Jamir, Rtd. Teacher

[Pai March 15, 2016 nü zülua toktsüba cet ka yangi adoktsür.]

2008 Election tua kanga majung agitet, 2013 küm tobo taoba Election dang nungi kanga agi tamajungba liasü, saka 2018 küm Election-jibo lanu putui temulung shitakba agi inyakra terabo melenshia tajungba nung agitsü nukla nung angur. Anungji na shiba südir süang tashi mangara, atapisüa akhi amato lira tangar tansütsü kuma lir ta tekümdangtsü O kar lemsateper.

Taruba Election nung kari toktepnüa lira kanga junga bilemdangerang telemtetba agiangma, kechiyong ne takoksaji asen kin takoksa, aser ne takokbaji asen kin asoshi khonang asütsü, ibaji khen züngzünga bilemdangdi.

1. Kar teka nung rongsen tera alibaji Election nung endokmar sensak tiai aitsü.
2. Kar tenzükba service tajung ajungdoker election nung madokra kanga takoksa asütsü.
3. Na tang mena aliba tamaren tongti menden nungji ne sülen na tatongsang amentsü atema tezülen nungi na Election-i aitsü ajungshitsü, sen agia yaridi ta asütsü, idangji nai shisa kaa telemtetba agiang. Aji oda mesüra ne tamaren service samaba den election nung tamakok ngua sentsütsür kümer na yakta arishi temadoktsü. Na takoksa tia nung alidang tangari sang soa toktsüba nung na apu ta meteta arutsü aser ne tatongsang to nai anojungi azüngteta yutsüba tamaren menden nung to mena angudang ne dangi tejashi arubajibo nai marezmükettsü. Anungji süngsem nung aliba ozü ana dang nungibo ne teka nung aliba ozü kaji taoba ta bilemdi.
4. Nisung kar mapa nungi sodi agidoker ano Election-i aitsü bilema lira, kanga bilemdanger dang mapa tenzüktsüla "kechiaser Aorji tebilemdang aliba kin" "Na Aor nür lima maitsütemji itemi (Identity)
 - i) Tamasa Yisu Loko (Nisan) asongdak.
 - ii) Tamasa Tsüngrem chirtem apokdak.
 - iii) Tamasa azü tokshiba anendak.
 - iv) Tamasa Missionary adokdak.
 - v) Tamasa yi tongpang raradak.
 - vi) Tamasa tashitemetet adokdak.
 - vii) Tamasa Chief Minister adokdak.

England yimli nung Queen Elizabeth nungi Queen Victoria mapang tashi nung küm noklang asem (300) shi alima ajak aramoka yimsü asü, anungji England yimli nung anü kodanga malur ta jembibaji tapet liasü. Ibaji mesüka küm noklang tema Aor ket nung Nagalima senmang agütsür aruogo. Tesüiba mapang asen tsüraburtemi mapa tajung inyakba agi tanü na koba jenjang nung lir aji pari alanzükba ta züngshir, tanü nai koma inyaker iba süngjangji asüng ner chiri achitsü "Taku asü Tanang" asütsü bilemdangang kechiaser "Na Aor"

NI YA SHINER

-T. LIMA TZÜWAR, UNGMA IMPANG, ARTANG WARD MKG

Temeim asen Aor Aotsür aser Naga nunger amangba purtem aser nütsüang nübur tajungtem, Laishiba nung yamai ashir, nai ne tsüngdang tanga tsüngrem kecha telidaktsü. Ano sayutsüngir ken nunga yamai ashir, repringang linük nung wara ka arudar, aji taküm chiyongtsü wara masü, saka Tsüngrem o mangashiba wara, tzüyim nungi tzüyim tatem tashi, anüdok nungi anü lulen tashi oli aruli ta asemteptsü, saka Tsüngrem o mangutsü. Revival shia asenoki iba ken atener asünung amangba pur mulungjang nung kechi bilemdar, Tsüngremi jembir asü mesüra mojing tanülai jembir.

India lima ajak nung tamangba yimsü ka tang akümtsü sentong yanglur, koda tetsübuttsü. Asenokji India kübok alir, aji saka Nagaland yabo Khristan lima asünungji asen Ao Aotsür aser Naga nunger amangba pur aser nütsüang nübur mulungjang nung kechi tebilemba lir. Tsüngremi jembir asü mesüra mojing tanülai jemir aser Nagaland ya meimer asü memeimer. Nagaland ochi mashi olura den taoba küm 2015 küm Zeliang-i asa-a Rani sungyanglu tepushi-i oa aküm tsübu agüja tetushi agütsü. Iba nungshilong ya Nagaland nunga ayutsü tasür arua sangdong aser paper nung adoktsü. Pai ashiba o tu Ao Milen aser Tir Yimyim nunga atoktsü. Zeliang-i ashiba nungtoba iba nungshilong azünga liaka tamang yimsüdak mekongshitsü tabo shiogo. Saka BJP aser RSS teloki India lima ajak tamang ka tang asütsü sentong yanglur. Nagaland yabo jungaka mejungaka Khristan lima asünung yangibo mekongshitsü merangdi arungma, oda asenok amangba pur ajaki Nagaland ya tajungba yanglushitsü, melenshitsü aser Khristan lima shitakba yanglushitsüsa sarasadema ochishir aser Tsüngrem meteter aser tangateter ABAM aser NBCC amala nungia nisung kar shimmer election-i yok nungbo kanga ajungtsü amai bilemer aser angateter, aji mesüra asen Nagaland-i tangar kodanga memeneptsü, saka tamajungba tang akümtsü. Asen tamang tongpangji tanbai asütsü, anungji Nagaland tia ya asoshi amangba pur ajaki sarasadema apusodi arungma.

TSÜNGREMI JEMBIBA

Temeim asen Aor Aotsür aser Naga nunger amangbapurtem aser nütsüang nübur tajungtem, 12th May 2017 aonung pangmang nung tenyar obendangbai kü dang yamai ashi, Nenok Aor Aotsür aser Naga nunger amangba purtem aser nütsüang nüburtem, iba lima nungbo pei kechi amangner amangang, saka tanüla asoshibo Tsüngrem ka dang lir aser Pai o bendanger. Akhidang lipok nungi tanü tashi nütsüang yongzük kwi süogo item tanülatem board tulu ka nung tenüng zülua lir, aser parnoki kechi inyak ajak yangji zülua lir. Kotak nungbo nütsüang yongzük merijang 7 sür 200 tang pelatepa lidar. Anungji nenok akümlir pei taküm melenshia ata-a liang ta shir oadok!!!

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Khristantemi 'Thy Kingdom Come' sentong nung shilem agitsü



London, May 19 (Agencies): Canterbury nung Archbishop, Justin Welby-i tan ita tatemlen agitsü aliba "Thy Kingdom Come" sentong nung Khristan tamanger ajaki shilem agitsü ayongzükogo.

Iba sentong nung Khristan meyrjang aika adentsü osang agütsüogo, ta Christian Today ajanga metetdaksü.

"Iba ya Church of England indang dang masü, Anglican indang dang masü, saka Khristan ajak atema lir. Europe nung tensa tamajung ajurua alidang, asenoki akokba tashi sarasademtsüla" ta Canterbury

nung Archbishop-i ashi.

"Europe nung nisungtemi pei talidak toktsür tangaleni jena aoba aser raraba tensa atema t a m a n g e r t e m i sarasademtsüla. Asenoki kija aser teloktem ama Tsüngrem den tesentaktep akangshitsüla aser yimjung atema külemi mapa inyaksüla" ta Justin-isa ayongzük.

Iba sentong nung Catholics, Pentecostals, Baptists aser Anglicans ajaki shilem agitsü aser sentong kübok sarasadema jajaba, shimo milen service, yimdong nung sentong aser fireworks shilemtem alitsü.

Iba sentong nung Justin Welby aser worship leader Matt Redman nati anir agitsü aser BBC ajanga live sayutsü.

Iba sentong ya Emma Buchan-i ayongzük aser lai ashiba agi, "alima tesem balala nungi arogotemi onok dang South Africa nungi Canada tashi aser Brazil nungi Hong Kong tashi yariteptsü nangzükogo.

Tesem shia nung par mapang nung sentongtem ayongzük agitsü aser Hong Kong nungbo parnoki tenlakitem nung sentong tululu ayongzük agitsü aser 'prayer warriors' network ka tentetsü."

Trump-i Turkey nung US Pastor ka chioktsü asüngdangba atema pelar



Washington, May 19 (Agencies): US President Donald Trump-i Turkey Tir den ajurutepa senden amendang America nung pastor Andrew Brunson chioktsü mepishiba atema Evangelical lennirtemi Trump nem tenüngsang agütsü.

"Iba ya ajanga evangelicals aser White House tsüngda tongteprateptsü lenmang sadema aliba sayur" ta reshikangshi ajurur Khristantem atema inyaker aser kaketzülur Johnnie Moore-i ashi.

Pastor Brunson ya North Carolina nungi lir aser pa ya October ita Turkey nung pur tepuokdak yua lir.

"Pastor Brunson chiokdaksüsbaji onok teinyaksü lir. Onoki President aser Vice President na nema iba khuret angatetdaksüogo aser tenatia khuret agizüka inyakba atema pelar" ta Moore-i ashi.

Moore-i "Defying ISIS:

Preserving Christianity in the Place of Its Birth and in Your Own Backyard" kaket zülu.

May 16, 2017 nü Trump-i Turkey President Recep Tayyip Erdogan-i senden ka amendang, Turkey sorkari Pastor Brunson United States ket nung agütsütsü atema shiogo, ta White House sangdong ka nung metetdaksü.

Turkey nütsüng yongsük kübok Muslim nung noklang nung shilem 99 lir aser yaküm July ita sorkar atsüngdoktsü merangba sülen ketdangsertemi parnok den tokteperitem anema mapa inyaker. Turkey ketdangsertemi American Protestant tem dena merenshir.

Brunson ya Evangelical Presbyterian Church nung minister ka lir aser pa ya Izmir jila nung apu aser idak nungjagi tepuokdak kati anir ao. Pa Izmir jila nung küm 20 tema liyonga aru aser kiralongrar telok ka nung züngsema lir ta tiyazü

nung tai tonglokja pa apu, ta American Center for Law and Justice-i ashir.

Turkish Protestant ketdangser kati Brunson aser Fethullah Gulen-i aniba telok kecha sendaktepa mali, ta shiogo.

Brunson chioktsü atema mapaji ACLJ-i inyaker aser parnok chief counsel Jay Sekulow-i anogo ishika tejaklen Trump den ajurutepa iba onük lemsatepogo.

ACLJ den yariteper European Centre for Law and Justice-ia United Nations dang Pastor Brunson atema tiyongtsü nung mapa inyaksü mepishiogo. Turkey-i linük temzüng aser U.N. Charter anema mapa inyaker ta ECLJ-i UN dang ashi.

Taküm March ita U.S. Secretary of State Rex Tillerson-i Turkey yimtiba Ankara semdangdang Brunson kinungtsü den ajurutep.

ANOGO ABEN TSÜNGREM DEN

YISUI TANÜ AJAR

"Nenok tebelemer aser khu reta abener ajak, kü dangi arung, aser ni nenok nem anisüngzük agütsüdi" Mathi 11:28

Alima nung alidang asenok ajaki anisüngzük ya aginür. Kodang asenoki asentzü alua mapa inyakdir mesüra asenoki temang belema asayaba mapang, jajaba mapang, asenoki anisüngzük nüngdaker. Anisüngzük angudang asen shi, shisatsü aser asen temang ajakji ana tashi balaka nung asenok süngzük. Ano, kodang asen tanela jenjang nung koda masüba ajurudir, mesüra asen taküm nung shisabuluba kar ajurudir, asen tanela aser taküm rangbenji tipmatemer aser karbo pei temang nunga tashi maiter.

Asenok Khristan taküm ka nung pei tanelaji anisüngzük angutsüla. Tetezü, asen taküm nung koba temenen agi alena lir aji nüchi agi salatsütsüla. Iba tanela nüchi yabo alima tashi, meimchir tashi agibo mangutsü saka Tsüngrem ain agi dang angutsü. Ken zülur, John Newton taküm ya, nisung indang shishilembar ka liasü, saka iba temenen taküm ka yagi Yisu bushi nung, Newton nem Tsüngremi nüchi agütsü. Tanüa asenok ajak Yisui ajar, kechi asoshi? Pa-tekümtet, tepela aser taneptsü asoshi ajar!

SARASADEM:

Kibuba Yisu, Nü Ola angashitsü kü mulungjang lapokdakjangma- Amen

Pakistan nung Khristan tanur ka nem bail memela



Islamabad, May 18 (Agencies): Pakistan nung Khristan tanur Judge Iqbal yagi 2010 kati Mecca nung aliba nunga Khristan tsür Kaaba mezüngmeshiba Asia Bibi aitsü. Lai atema tai tonglokja lir Islam mezüngmeshi ta aser pa nem tanaben aitsüba sülen tasüba agi tashi bail magütsütsü merenshitsu obendang telemtetba agiogo, ta agüja lir.

Christian Telegraph Pakistan for All ta ser ajanga metetdaksü. human rights group

Kaaba ya Islam züngsem, Riaz Anjum-i nung atema temeshi World Watch Monitor nungshilung ka lir aser dang ashiba agi, "Judge tanubosang jagi Kaaba Iqbal-i Pakistan nung Facebook post ka 'like' Code of Criminal asüba aser lemsatepba Procedure nung arlla atema tai tongloktsü. 196 alema inyak,

Taküm February ita kechiyong iba arlla arishi küm 16 tain nung central mesüra Nabeel Masih nem local provincial government magistrate kati bail nungi temelaba magii temelaba magütsü. okadaki mezüngmeshi

Nabeel-i tesüiba ken o agizüka mapang ozüng alema angadangtsü makok ta inyaka mali anungji pa lateta lir."

chioktsüla ta pa atema Masih ya yaküm okatsüri mepishi saka September 18 nü apu. okadaki ibaji magizük. Pa apuba sülen iba

Tang-a Districts and Sessions judge, Naveeb Khristantem aika Iqbal-i kasa telemtetbaji tetsübu nung pei talidak agiogo aser pai ashiba toktsür jena ao saka agi, tanubosangi Muslim parnok tanaben meyipa nung temulung aruogo.

No.14011/01/2016-P&C
GOVERNMENT OF INDIA
MINISTRY OF INFORMATION AND BROADCASTING
SONG AND DRAMA DIVISION

Temulunger Private Cultural Troupes aser Casual Artistes (shirkok Individual Artistes/ Empanelled Artistes lir) parnok Song and Drama Division nung registration asutsu asoshi application meshir.

Song and Media Division ya Ministry of Information and Broadcasting Ministry kubok Media unit ka lir aser iba ya ajanga Central Government sentong aser inyaksangshi metetdaksutsu asoshi live media ajanga nisungtem tsungda tesendaktep yanglutsur. Division ajanga linuk nung tesem balala nung alir kin tapu balala tsungda sendaktepdakja pei oshi agi pei sobaliba kentemenü idaktsua loktiliba putepa alitsü, linuk telongjem, lokti temenen anema raraba, tetsurtem tashi itshidaktsüba, tzu mopong merüka alitsü aser talisa yimtak yimtsungtem nung terenlok mapa inyaksüba, health & family welfare aser Education onüktem nung sentong tapu balala atonga inyakba mapatem ya tongtibang mapa kar asutsü.

Registration asoshi application meshiba ya Regional centres Bangalore, Bhopal, Chandigarh, Delhi, Guahati, Kolkata, Lucknow aser :Pune asoshi tapu ana alitsü, kaji Private Cultural Troupes aser kaji Casual Artistes/Individual Artistes/Empanelled Artistes. Iba registration agiba ya Ministry of Information and Broadcasting-i approve asüba guidelines parnok shidi No.M-27015/2/2015-FS dated 21.07.2016 nung shia aliba ama asutsü aser itemji website www.dfp.nic.in nung angutsü. Iba atema application agutsurtemi guidelines-ji junga azungtsü mepishir.

Iba application ya prescribed format nung temulungertem Pvt. Cultural Performing Parties. Troupes of Drama, Composite Programmes, Folk Music aser Dance Traditional Recitals, magic, Mythological Recitals, Puppetries etc aser individual artists item nungi kum asem asoshi meshir **West Bengal, Odisha, Andaman & Nicobar Island, Arunachal Pradesh, Assam, Nagaland, Manipur, Meghalaya, Mizoram, Tripura, Sikkim, Uttar Pradesh, Uttarakhand, Delhi, Haryana, Punjab, Himachal Pradesh, Jammu-Kashmir, Chandigarh, Madhya Pradesh, Chattisgarh, Rajasthan, Maharashtra, Gujarat, Goa, Daman Diu, Dadra & Nagar Haveli, Karnataka, Kerala and Lakshadweep Island.** Iba application agutsurtem ya pei oshi aser pei sobaliba aser inyaksangshi ashitsüla. Ano, iba application ya Drama, Dance, Instrument, Singer aser tanga performing mapatem nunga individual artists nungi empanelment asutsu asoshi meshir. Annexure 1 nung prescribed proforma page 3 nung agüja lir, ibaji Private Cultural Troupe aser Casual/ Individual artistes na prongla atema Empanelment atema asutsu. Iba application agutsurtemi, nungdakra, tapak tali enoksema zülur agutsüsua akok.

Application agutsurtemi item ya jungjunga metettsüla :

- Song aser Drama Division kubok registration/ empanelment asoshi India nung sensotem nungi item Private Cultural Troupes aser Casual Artistes / Individual Artistes / Empanelled Artistes nungi application meshir.
Drama, Dance-Drama, Street Play & Composite Troupe, Folk & Traditional Recitals, Magic, Puppet, Mythological Recitals etc and related theatrics. tech.
- Troupe/ Individual Artistes shia state/UT ka nungi dang pei state nung jembiba oshi nung dang shilem agitsü asoshi tenung agutsütettsü.
- Envelope tema nung Category/ language aser State/UT tenung zülutsüla.
- Troupe (Private Cultural Troupe) aser Casual Artistes / Individual Artists (Empanelled Artistes) kati region ka nung Song and Drama Division den registration asutsu asoshi asungdangtsü akok. Private Cultural Troupes / Artistes yangi agüja aliba tesemtem nung kongsa register süa ali, item jagi yangi agüja aliba Regional Office nung asungdangtsüla :

Name & Jurisdictions of the Regional Centres

Sl. No.	Regional Centre	Jurisdiction	Application to be sent
1.	Kolkata	West Bengal, Odisha and Andaman & Nicobar Island	The Deputy Director, Song & Drama Division, 15, R. N. Mukherjee Road, 3rd Floor, Kolkata-700 001, West Bengal. Ph. 033-15655/22315536.
2.	Guwahati	Arunachal Pradesh, Assam, Nagaland, Manipur, Meghalaya, Mizoram, Tripura, and Sikkim.	The Deputy Director, Song & Drama Division, KKB Path, Hati Gaon, Guwahati – 781003, Assam. Ph.0361-2231056
3.	Lucknow	Uttar Pradesh and Uttarakhand	The Deputy Director, Song & Drama Division, Kendriya Bhawan, 8th Floor, Hall No.4, Aliganj, Lucknow - 226024, Uttar Pradesh. Ph.0522-2746677.
4.	Delhi	Delhi and Haryana	The Deputy Director, Song & Drama Division, 1024, 10th Floor, Soochna Bhawan, CGO Complex, Lodhi Road, New Delhi-110003. Ph.011-24365760.
5.	Chandigarh	Punjab, Himachal Pradesh, Jammu-Kashmir and Chandigarh UT.	The Deputy Director, Song & Drama Division, SCO-358, Second Floor, Sec-32/D, Chandigarh – 160047, Punjab. Ph.0172-2601366
6.	Bhopal	Madhya Pradesh, Chhattisgarh, and Rajasthan	Song & Drama Division, 146-Rachna Nagar, Bhopal-462023, Madhya Pradesh. Ph.0755-2585249.
7.	Pune	Maharashtra, Gujarat, Goa, Daman Diu, Dadra & Nagar Haveli States/UTs.	The Deputy Director, Song & Drama Division, 47/30-C/1/1, Pune Satara Road, Dr. Arneyshawar Corner, Paravati, Pune-411009, Maharashtra. Ph.020-24220660.
8.	Bangalore	Karnataka, Kerala and Lakshadweep Island.	The Deputy Director, Song & Drama Division, Kendriya Sadan, A-Wing, Ground Floor, GPOA, 17, Main Road, II Block, Kormangla, Bangalore-560034, Karnataka. Ph. 080-25537993/25502164.

5. Telok nung tanishir / individual artiste indang tawa agiba Passport size noksa copy asem Gazetted Officer / bank Manager/ School Principal / State government office masi ka nung State Government Officer/ Officers Undertaking Officers nem attest sudaktsur Application Form den külemi enoktsüsüla.

6. Tawa Troupes pur telok agiba noksa copy asem application den enoktsüsüla.

(1) Nisung ka nungi tenet tashi aliba noksaji Post Card Size asutsüla.

(2) Nisung ti nungi 15 ser tema aliba noksaji Cabinet size asutsüla.

(3) Item noksatemji Gazetted Officer / Bank Manager/ School Principal / Post Masters / State government office masi ka nung State Government Officers/ Undertaking Officers nem attest sudaktsur Application Form den külemi enoktsüsüla.

7. Noksatem denji shitapak balaka nung Artistes / Performers indang item ya zülua alitsüla : (1) Name, (2) Father's/Husband's Name, (3) Address with residential proof, (4) Whether belong to SC/ST/OBC, (5) Educational qualification, (6) Religion, (7) Mother Tongue, (8) Nationality, (9) Role in the Troupe/Party. Iba tapak nung Troupe leader-i sign asutsüla.

8. Tanishir dena artistes ajak **01:07:2017** anogo tashi nung artistes ajak **arishi kum 18 tekupbok masutsüla.**

9. (i) Cultural Troupes Artistes aser Casual Artistes / Individual Artistes / Empanelled Artistes puritemi shia **Character Certificate anana khuret bentetba tejangja nisung anati kuli agutsüba dena enoker application agutsüsüla.** Iba Character Certificate-ji kuma ana dak tali tejen masutsüla. Iba Character certificate ya Gazetted Officer masi ka nungi mesüra Local body nung shimteta nisung/ Panchayat tekolakba nung seal dena mesüra local bodies dang nungi tekaba alir ozung yanglurtem, PSU banks nung Bank Officers, India government nung ketdangser masi ka, State Govt. Undertakings, Govt. Doctors, Post Masters, Registered Medical Practitioners masi ka (RMPs), Army Officers aser zungsem mesüra Centra:/ State Government nung inyakterem, school tesayurtem (Recognised asüba school masi ka) nungi agitsü akok.

(ii) Northeast states nung aser LWE affected districts/ Areas nung nubortem alidak anasa government office mesüra office nung inyakterem mesüra elected representative mesüra local body mesüra Panchayat malitsua akok, iba ama tesem nungi talirtem rongnung ajak dang tambu aser tantsü / arogo nung putir/ RMP masi kati/ Armed Forces nung inyaker/ Para-Military Forces nung inyaker/ Post Master/ School Tesayurtem/ State mesüra Central Govt Undertaking Telephone, Prasar Bharati, Health, Irrigation, Power Bank etc nung inyaker masi kati Character Certificate agutsüsüla akok.

10. Troupe aser Casual Artistes/ Individual Artistes / Empanelled Artistes lenirji azungtsü aser zülutsü akokba nisung ka asutsüla aser pei region nung jembiba oshi zungtetter, zülutetter aser jembitetter asutsü merangtsüla. Iba telok nung lenirji nubortem den junga jembiteta aser pa/laji artiste asü tajungba, yamaji masuyonga pa/la dakji stage aser live arts indang kanga junga metetba nisung asutsüla. Pa/ la jagi government sentongtem indang kanga junga meteta alitsüla aser linuk nung tongtibang onüktem indang meteta alitsüla.

11. Iba maparen dak aketba nung Screening Committee ajanga audition/screening test agiba nung adenba atema TA/DA malitsü.

12. (A) Drama Troupe aser Composite Troupe (anaprongla) nung teimtiba agi artistes/ performer 20 (metsü) dang telok shia nungi empanel asutsü merangtsü. Ajsüka, Composite mesüra Drama category Troupe (ka mesüra ka) contract yanglubaji shimteter aliba Private Registered Troupes (PRTs) asoshi dang alitsü aser yangji members/performers teimtiba agi 11 (terka) aser ishitiba agi 8 (ti) asutsü. Private Registered Troupes (PRTs) tenung nung shilem agirtemji tekalen shia aliba screening/ audition agiba mapang shimteta list nung alirtem asutsüla.

(B) Folk & Traditional Recital, Mythological Recitals, Magic, Puppet etc. asoshi shilem agir nisung teimtiba agi 16 (tertrok) shimtetsü akok, ajsüka contract-bo shilem agir (shimteta aliba telok nungi) teimtiba agi nisung 7 (tenet) nem dang agutsüsü. Private Registered Troupes tenung nung shilem agirtemji tekalen shia aliba Screening / audition agiba mapang shimteta aliba artistes list nung alirtem asutsüla.

(C) Telok purtem rongnung zungsem melentsübaji Screening/Audition test tashi nung dang melatsü, iba sülenjibo telok purtem zungsem melentsü kenyongi memelatsü. Song and Drama Division purtemi tendangertem lia Screening agiba mapang Artistes noksa agitsü aser iba nungi ajemdaker result agutsüba sülen teshimtetertem parties/troupes nem Division-i identity card agutsüsü. (Ibaji Sl.Nos.5 & 7 nung shia aliba ama ataloktsü nung dang agutsüsü).

13. Meyipa mangutsüba Registration Fees Demand Draft ajanga application den külemi agutsüsü. Meyipa mangutsüba Registration fee telemsa yamai alitsü :

(a) Meyipa mangutsüba Registration fee-ji Rs.2,000.00 (Rupees Two thousand only) parties/troupes nung artistes/performers nisung 10 (ter) mesüra tema purtem atema alitsü.

(b) Meyipa mangutsüba Registration fee-ji Rs.1,000.00 (Rupees Two thousand only) parties/troupes nung artistes/performers nisung 10 (ter) dak tajemba purtem atema alitsü. Individual artistes ajak (Empanelled Artistes) Rs.1000.00 (senpak meyirijang ka) deposit asutsü nungdaktsü.

(c) **Application tapu ajak atema meyipa mangutsüba Registration fee ya Demand Draft ajanga dang Drawing and Disbursing Officer, Song and Drama Division, New Delhi tenung nung agutsüsüla.**

14. Registration fees magutsüsü purtem :

(1) Troupe ka lenisangji item telok nungi süra Registration fee magitsü : (i) SC mesüra (ii) ST mesüra (iii) tetsür. Troupe/ Troupes koba nung ST mesüra SC tetsür zungsem 50% lidir, iba telok nungi Registration fee magitsü. Troupes shirkokisa iba teyari aginür, parnoki application form den certificates shitak agutsüsüla.

(2) Ministry of Home Affairs ajanga repringtetba **Left Wing Extremism Districts** nung alir Casual Artistes/Individual Artistes / Empanelled Artistes indang tsunglanglen agüja alirtem dang nungi Registration fee magitsü :

Sl. Nos.	States	Name of Identified Districts
1.	Andhra Pradesh & Telengana	(1)Anantapur, (2)Adilabad, (3)East Godavari, (4)Guntur, (5)Karimnagar, (6)Khamam, (7)Kurnool, (8)Medak, (9)Mehboobnagar, (10)Nalgonda, (11)Prakasam, (12)Srikakulam, (13)Visakhapatnam, (14)Vizianagaram, (15)Warangal, (16)Nizamabad.
2.	Bihar	(17)Arwal, (18)Aurangabad,(19)Bhojpur, (20)East Champaran, (21)Gaya, (22)Jamui, (23)Jehanabad, (24)Kaimur, (25)Munger, (26)Nalanda, (27) Nawada, (28)Patna, (29)Rohtas, (30) Sitamarhi, (31) West Champaran, (32) Muzaffarpur, (33)Sheohar, (34)Vaishali, (35)Banka, (36) Lakhisarai, (37)Begusarai, (38)Khagaria.
3.	Chhattisgarh	(39)Bastar, (40)Bijapur, (41)Dantewada, (42)Jashpur, (43)Kanker, (44)Korea(Baikunthpur), (45)Narayanpur, (46)Rajnandgaon, (47)Sarguja, (48)Dhantari, (49)Mahasamund, (50)Gariyaband, (51)Balod, (52)Sukma, (53)Kondagaon, (54)Balarampur.
4.	Jharkhand	(55)Bokaro, (56)Chatra, (57)Dhanbad, (58)East Singhbhum, (59)Garhwa, (60)Giridih, (61)Gumla, (62)Hazariabag, (63)Koderma, (64)Latehar, (65)Lohardaga, (66)Palamu, (67)Ranchi, (68)Simdega, (69)Saraikela-Kharaswan, (70)West Singhbhum, (71)Khunti, (72) Ramgarh, (73) Dumka, (74)Deoghar, (75)Pakur.
5.	Madhya Pradesh	(76)Balaghat,
6.	Maharashtra	(77)Chandrapur, (78) Gadchiroli, (79) Gondia, (80) Aheri.
7.	Odisha	(81)Gajapati, (82)Ganjam, (83)Keonjhar, (84)Koraput, (85)Malkangiri, (86)Mayurbhanj, (87)Navrangpur, (88)Rayagada, (89)Sambalpur, (90)Sundargarh, (91)Nayagarh, (92)Kondhamal, (93)Deogarh, (94) Jajpur, (95) Dhenkanal, (96)Kalahandi, (97)Nuapada, (98)Bargarh, (99) Bolangir.
8.	Uttar Pradesh	(100)Chandauli, (101) Mirzapur, (102) Sonebhadra.
9.	West Bengal	(103)Bankura, (104) Midnapore, (105) Purulia, (106) Birbhum.

* Tang tashi nung tarensenji yamai lir, empanelment mapang district/districts LWE agi kongshia lir ta sangdongbatema iba kubok adentsü

15. Private Cultural Troupe aser Casual Artistes / Individual Artistes / Empanelled Artistes purtem ya Song and Drama Division kùbok contract nung inyakterem dang lir. Parnokji Song and Drama Division, Government of India nung inyaker makùmtsù. Parnok register sùr kùlen PRTs nema ya sentongtem lemzùktsùsbaji Government of India khuret masùtsù aser sentù ama ka mezùngshitsù. Empanelment tetezù kodang nùngdakdir shilem agitsù atema tenùng zùluoja ayuba dang lir.
16. Private Registered Troupes (PRTs) aser Casual Artistes / Individual Artistes / Empanelled Artistes shirnoksa tekalen shia aliba shilem agitsù mapang ngudir, idangji yimya tajung beshitsùla. Kodang Song and Drama Division, Govt. of India tenùng nung shilem agidir parnok yimyajì nùbortem tsùngdang tatishitsù tajung asùtsùla. Artist /PRT kar anema danga ken o arura itemji anendaktsùtsù asoshi department dak tashi alitsù.. PRT nung zùngsemtemi lokti anema inyakba maparen nung division-i khuret mabentsù.
17. Screening/audition temer kùlen Screening Committee-i Song and Drama Division nung registration agitsù atema screen agir troupes shimba osang metetdaksùtsù.
18. **Shitak renemer agùtsùba application dang agizùktsù.** Applications agùja alibatem reprangdang kùlen troupe lenirtem/ individual artistes shirnok meyong application shitak lidir Screening Committee Members nem screening/ audition agidaksùtsù atema parnok den kùlem shilem agitsù pur co-artistes/performers aser tanga documents ajak bener arutsù temepishiba yoktsù.
19. **Grading of Private Cultural Troupes aser Casual Artistes/individual Artistes/Empanelled Artistes :** Screening Committee purtemi screen ser aliba Troupes aser Casual Artistes/Individual Artistes/ Empanelled Artistes purtemi agiba shilemtemji reprangdangtsù aser item teloktem nem Grade "A", Grade 'B', & Grade 'C' ta item yimya nung ya agùtsùtsù :
Mark 100 nungi mark 50 dak tema anguba Private Cultural Troupes aser Casual Artistes/Individual Artistes/Empanelled Artistes tem Song aser Drama Division nung empanelment asùtsù atema agizùktsù
 1. Private Cultural Troupes/ Casual Artistes/individual Artistes/Empanelled Artistes shirnok marks 100 nung 85 % & tema ngudir, parnokji "A" Grade angutsù.
 2. Private Cultural Troupes/ Casual Artistes/individual Artistes/Empanelled Artistes shirnok marks 100 nung 65 % & tema saka 85 % dang tekùpbok ngudir, parnokji "B" Grade angutsù.
 3. Private Cultural Troupes/ Casual Artistes/individual Artistes/Empanelled Artistes shirnok marks 100 nung 50 % & tema saka 65 tekùpbok ngudir, parnokji "C" Grade angutsù.
20. Screening Committee-i recommend asùbaji final asùtsù aser iba recommendation nungji ajemdaker Song and Drama Division Director-i shimteta aliba Private Cultural Troupes/ Casual Artistes/ individual Artistes/Empanelled Artistes nem Song and Drama Division nung register asùtsù atema approval agùtsùtsù.
21. Shilem agirtem tendangbaji parnoki agiba sùoshi, oset amshiba, kongki amshiba aser tereprangertem nem angatetdakja yimya tajung agi shilem agibatem ajak nung reprangtsù.
22. Iba sentongtem register sùla aliba Private Cultural Troupes/ Casual Artistes/ Individual Artistes/Empanelled Artistes nungertem shirnoki mapang shia Division-i yokba teinyaktsùtem shilem mapang shitak nung agiba, mapang shitak nung noksa aser shilem agiba kulitem den tangari tebilemba ashiba ajak dena bill agùtsùba maparentem nung shitak inyaka anidaker, parnok nem dang agùtsùtsù.
23. Sentong temer kùlen aser bills aser nùngdakba documents/ certificates ajak agùtsùr kùlen shilem agiba atema senji shimteta aliba Grade nem lemzùkja aliba agùtsùtsù.
24. Sentong agiba asoshi agùtsùtsù aliba senji Ministry of I & B ajanga lateta aliba jenangaser guidelines nung ajemdaker Song and Drama Division nung register sùla alir Private Cultural Troupes/ Casual Artistes/ Individual Artistes/Empanelled Artistes tenùng nung agùtsùtsù.
25. Sentong agiba asoshi sen Division-i agùtsùtsù aliba sen agùtsùtsùsbaji Song & Drama Division mapa asùtsù.
26. Regional center nung sen aliba jenjang apir Division nung nùngdak repranga shilem agitsù asoshi sentongtem agùtsùtsù.
27. Private Cultural Troupes/ Casual Artistes/ Individual Artistes/Empanelled Artistes nung talang nung alirtem dena mapang tatsùka tsùngda anogo 10-15 shi lia osang yoka shilem lemzùktsùba ajak inyaksùla.
28. Teinyaktsù guidelines nung shia aliba ama Screening Committee ajanga dang shilem agibatem reprangtsù ta apply sùla alirtemi metettsùla. Empanel asùtsùsbaji Screening Committee-i screening aser assessment agiba mapang shilem agiba nungi agitsù. Iba dakji alaka empanel asùtsù atema tanga kuli kecha magitsù. Anungji, apply sùla alirtem dang kija aser teloki empanel sùtsùtsù nangzùkaka, item nemji mashiokdaksùtsùla. Screening Committee ya empanel atema shinga nema manidaksùtsù.
29. Kuli kecha magùtsùla application agizùktsù aser magizùktsùji Song and Drama Division nung Director dak tashi alitsù.
30. Iba advertisement dak aketba tejangja temetetsù ajak **tang adokba Employment News, Rozgar Samachar, osangkakettem aser website www.dfp.nic.in** nung angutsù. Ano tejangja temetetsù nùngdakra, troupe leniri Song and Drama Division, Regional Center den tongteprateptsùla.
31. **Prescribed Proforma nung application jungjunga renemer Song and Drama Division, Regional Center office ket 26th June, 2017 anogo tashi nungbosa atongtsùsa tekalen agùja aliba address nung yokangma.**
Date : New Delhi/ 11.05.2017.

Director
Song and Drama Division.

**REGISTRATION OF PRIVATE CULTURAL TROUPE/ INDIVIDUAL ARTISTES (EMPANELLED ARTISTES)
WITH SONG AND DRAMA DIVISION
APPLICATION FORMAT**

Affix 3 copies of Passport size photograph of the Leader/Individual Artistes (Empanelled Artistes).
Duly attested by the Gazetted Officer/Bank Manager/School Principal/State Govt. Officers/ Officers of any State Govt. Offices/ Undertaking officers.

1. Name of the Troupe/Organisation (in Block letters) _____
2. Address of leader/Individual Artistes with residential proof _____
3. Name & Address of the Leader/ Individual Artistes _____
4. Date of Birth of Troupe Leader/ Individual Artistes _____
(Age as on _____ : _____)
5. Father's/Mother's/Husband's/Wife/ _____
Guardians' name _____
6. Educational Background of Troupe Leader/Individual Artistes _____
7. Experience, if any _____
8. Details of performance in the past _____
(Enclosed additional sheets)
9. Type of Performance(Drama/Musical/ : _____
Dance Drama/Puppet/Magic/Folk & _____
Traditional Recital/Mythological Recital/ _____
Composite/any other) _____
10. Language of the performance _____
11. Numbers of Artistes (1) To be appeared before Screening Committee : _____ Male _____ Female _____ Total _____
(2) For Presentation of Programmes after getting registration : _____ Male _____ Female _____ Total _____
12. Nos. Of Women/SC/ST Artistes of Troupe : _____ Women, _____ SC & _____ ST
13. Whether amateur/Professional : _____
14. Name of the Bank and Account No. of troupe, if any : _____
15. Name/Father's Name/Husband's Name/ Guardian's Name, Address, Age of the Artistes (enclosed separate Sheet/ documents): _____
16. Details of the Demand Draft Nos. : DD Nos. _____
Enclosed with the application: Date: _____, Rs. _____ (Rupees _____ Only).
17. Nos. of documents enclosed with the Application: _____
18. Name & Address of two eminent persons: (1) _____
Who could certify about the competence of the Troupe and Leader as well. (2) _____
(Witness by two persons).
19. Whether required character certificates and Other documents of all the Artistes including Leader/ Individual Artistes have been enclosed : _____

I hereby declare that all above statements and documents attached are true to the best of my knowledge and belief.
 Dated : _____
 Place : _____

Signature of Applicant (Troupe Leader/ Individual Artistes)

FOR TROUPES ALREADY REGISTERED

1. Name of the Troupe _____
2. Name & address of the troupe leader _____
3. Since when the Troupe is registered _____
4. No. of Programme allotted during April, 2013 to December, 2013 _____
5. Nos. of programmes executed/performed _____
6. Nos. of programmes refused/not executed _____
7. Nos. of Artistes changed/dropped after screening _____
8. Category in which Troupe registered _____
9. The Regional Centre of the Division attached/The troupe is attached with _____
10. Enclosed a group photo of the members of the party already furnished. _____

I hereby declare that all above statements and documents attached are true to the best of my knowledge and belief.
 Dated : _____
 Place : _____

Signature of Applicant


Application den kùlemi agùtsùtsùla:

Sl. Nos.	Name of Artistes/ Leader	Father's/ Husband's name	Address	Whether belong from SC/ST/OBC	Educational Qualification	Religion	Mother Tongue	Nationality	Role in the Troupe
1	2	3	4	5	6	7	8	9	10

Date: _____

Signature of the Troupe Leader

Basquiat-i yangluba noksa ka New York nung sen million \$110.5 agi ayok



New York, May 19 (Agencies): Artist, asür Jean-Michel Basquiat-i yangluba noksa ka New York nung auction ka nung sen million \$11.5 agi ayok.

Iba noksa alisang-i taoba küm Basquiat-i yangluba noksa ka alia otsü tasen ka yanglua liasü, saka pai iba otsü tanaben yanglushiogo.

Iba noksa alizükba ajanga otsü tasen aika yangluogo aser US nung artist ajanga yangluba oset ayokba nung ibai jenjang tasaktiba agi alizükba kümogo. Tanak nisungi

yangluba noksa jenjang tasaktiba agi ayokba otsü-a iba noksa ajanga yanglu aser 1980 sülen yangluba noksa aliba nung sen million \$100 dang tema agi ayokba nung ibai mezüing kümogo.

Iba nüngja makaba mapa ya oil stick, acrylic aser spray paint agi nisung tejak ka teret kisüing yanglua lir.

Iba noksa ya Japan nung fashion entrepreneur, arishi küm 41 tain, Yusaku Maezawa-i alizük aser pai par ki aliba tesem, Chiba nung museum ka lapoktsü sentong lir.

Sotheby nung iba noksa alitsü asoshi 'bidding' ya minute 10-shi agi. Maezawa-i iba noksa ya telephone ajanga jembia alizük.

Iba noksa ajanga pa kanga pelar ta Maezawa-i Instagram nung zülu.

Basquiat-i yangluba 'horned devil' noksa ka taoba küm Maezawa-i sen million \$57.3 agi alia otsü tasen ka yanglua liasü.

Basquiat ya New York nung arishi küm 27 lia 1988 küm 'heroin overdose' ajanga asü. Pai noksa yangluba mapa ya küm 7 dang inyaker asü.

Pai yangluba noksa timba nung Africa-America nungertemi US nung tim atemba indang otsütem sayua lir.

Jara ama nung noksa yanglur, Basquiat-i yangluba noksa ya khen bo sen \$50 agi yoka liasü saka dang bo Pablo Picasso aser Francis Bacon nungeri yangluba noksatem den jenjang kati iogo.

Jean-Michel Basquiat ya Brooklyn, New York nung 1960 küm aso. Tebu ya Puerto Rico nungi liasü. Pa arishi küm 15 asü dang school doktsü. Nüburtem dang pai yangluba noksa ya mezüing 1980 küm The Time Square Show nung sayua liasü.

Basquiat ya heroin overdose agi 1988, August 12 nung pa indang Manhattan art studio nung asü.

London Airport nung mezüingbuba Digital Air Traffic Control inoktsü

London, May 19 (Agencies): UK nung aliba yimtitem rongnung London ya mezüingbuba digital indang 'air traffic control' amshitsü, ta osang ajanga ashi.

Tower nung mener tayimtsütem abosoba aser arua anenba repranga aliba melena 'high-definition' camera ajanga tayimtsü anendak kechi inyaker, ibaji kilometre 128 bila orraliba tesem ka nungi reprangtsü, ta osang ajanga ashi.

Iba sentong tasenba ya 2018 nung renemtsü aser küm ka

tendanger 2019 nungi amshi tenzüksü.

Osang ajanga ashiba agi iba sentong ya Australia, Sweden, Norway aser Ireland nungbo tendangogo.

Iba technology ya Sweden defence & security company, Saab ajanga yanglu aser iba technology tasenba ya sen million £350 indoka London City Airport yanglushitsü asohi sentong tenzükba nung shilem ka lir aser terminal building tuluba küma yanglushiba nung

2025 tashi nung küm shia

passenger million ana nem küm shia iba airport ajanga teyari agütsütsü.

Iba controller nem 360-degree nung iba tayimtsü anendak reprangtetsü asoshi high-definition camera 14 inoktsütsü, 'pan', 'tilt' aser 'zoom' sütetsü asoshi camera ana inoktsü.

Item camera nungi 'live' nung fibre cable ajanga Hampshire nung aliba operation room nem noksa agütsütsü.

London City Airport indang digital tower feet 164 talang ya 2019 nung lapoktsü sentong lir.



Kiev, May 19: 2017, May 19 anogo Kiev, Ukraine nung International AIDS Memorial Day amongdang AIDS tashidak agi asür tenüing nung nüngshilong ka yanglua aliba anasa nüburtemi parnok asürtem bilemteta shilem agidang tangokba noksa nung angur.

LG G6 smartphone jenjang ajemogo, sen 41,990 agi angur

Mumbai, May 19 (Agencies): Taoba ita sen 51,990 jenjang LG G6 smartphone sayaba jenjang tajemba agi angur.

Iba LG G6 ya sen 41,990 agi 'limited-period price cut' mapang angur. Iba smartphone jenjang ajemba ya BYOD offer kübok lir aser May 18 nungi June 15 tashi alitsü, ta Mumbai nung aliba Mahesh Telecom ajanga ashi.

Iba smartphone den külemi sayaba Tone Active+ HBS-A100 Bluetooth headset nunga LG ajanga sen jenjang shilem

50 agi tajemba nung agütsür. LG G6 ya Mobile World Congress (MWC) 2017 nung 'Astro Black', 'Ice Platinum' aser 'Mystic White' sentsütem nung sayaa liasü.

Iba phone ya sen 57,900 jenjang Samsung Galaxy S8 den tokteper ka amai liasü.

LG G6 smartphone nung ya Android 7.0 Nougat aser Qualcomm Snapdragon 821 chipset keta lir. Iba phone nung 4GB RAM aser internal memory ya 64GB lir. Iba phone tesülen nung camera ana keta lir.

Apple indang 'Made in India' iPhone tem tendanga ayoker



Bengaluru, May 19 (Agencies): US nung aliba Apple indang iPhone tem India nung bentena yanglubatem tendanga ayok tenzükogo.

"India nung teshiemtet store kar nung iPhone SE ayoker. Iba phone indang oset balala ya India nung atongtena yanglur tendangtsü asoshi tatakzük ka ayoker," ta industry osang ka ajanga ashi.

Saka tang tashi Apple ajanga bo kicha osang metetdakja mali.

Source ajanga iba phone indang noksa sayuba nung 32GB storage capacity lir aser 'Designed by Apple in California, Assembled in India', ta zülua lir.

Noksa nung shia aliba agi iba phone jenjang ya sen 27,200 lir. Osang ajanga ashiba agi,

iPhone SE Bengaluru nung yangluba maparen April nung tempangogo, ta osang ajuanga ashir.

Item unit ya Taiwan nung Apple den külemi iPhone yanglur, Wistron Corp ajanga 'assembled' asü.

India nung iPhone yangluba ajanga Apple indang phone tem nung jenjang tajemba kümdaktsütsü aser India nung phone shishilembadak mera tasen akishitsü, ta Karnataka IT Minister, Priyank Karge-i tawa osangbener dang shia lir.

China den tokteptsü asoshi Centre tebilemba lira Apple kisüing masü saka Samsung aser Lenovo indang manufacturing unit tem-a lapoktsüla, ta Karge-i shisem.




Cannes, May 19: 70buba Cannes Film Festival nung "Un Certain Regard" telemsa nung tokteperba 'Lerd' (A Man of Integrity) film indang Director, Mohammad Rasoulof aser film nung shilem agirtem Nasim Adabi, Mohammad Akhlaghirad aser Soudabeh Bezaee nungeri noksa tangokdaktsüba angur.

Happy Birthday

TENÜNG : AYIJEM LONGKUMER
 Tasoba anogo : 18/5/16
 Talidak : Bank Colony, Dimapur
 Jabaso Ayijem Longkumer küm ka tashi arishi moatsü nung Tsüngrem tenüing asanger. Yamaji maneni arishi talang den anema lijangta Tsüngrem dang sarasatemsür.
 -Oja, oba, otsü, obou aser kinungertem.





New Delhi, May 19, 2017: Hokolbarnü New Delhi nung Ato kilonser, Narendra Modi-i 'M.S. Swaminathan: The Quest for a world without hunger' kaket sayatsüba noksa nung angur. Kasa noksa nung Agriculture & Farmers Welfare Union Minister, Radha Mohan Singh-a angur.

Service balala nung GST rates latetogo; shisaliok nung saru malitsü

New Delhi, May 19 (Agencies): Goods and Service Tax (GST) kübok Hokolbarnü GST Council-i service balala atema saru rates latetogo.

Service balala atema rate pezü lemsar saru shilem 5, 12, 18 aser shilem 28 alitsü aser Healthcare den shisaliok na nungbo GST saru malitsü.

Srinagar nung anogo ananü GST Council senden amenba sülen osangbenertem den jembidang Union finance minister, Arun Jaitley-i, "Sen lakh 50 mesüra iba dang tekübok aruba restaurant tem dang GST kübok saru shilem 5 agitsü aser non-AC restaurant dang saru shilem 12 meshitsü," ta metetdaksü.

Iba den külemi yi ayoktsü license aliba AC restaurants dang GST shilem 18 meshitsü

aser 5-star hotel tem dang shilem 28 meshitsü. Ano tariff sen 1,000 nungi 2,500 hotel tem dang shilem 12 meshitsü, ta paisa ashi.

Ano Ola aser Uber ama cab dang saru shilem 5 meshitsü, ta Jaitley-i ashi.

Telecom aser financial services dang GST shilem 18 agitsü aser race club, betting aser cinema halls dang saru shilem 28 agitsü.

Metro, local train aser tamang ainlen jajaba atema GST saru malitsü, ta Revenue Secretary, Hashmukh Adhia-i ashi.

Tayimtsü economy class nung senzüba atema GST shilem 5 alitsü aser business class nung senzüba atema shilem 12 agitsü, ta Adhia-isa ashi.

Ano hon atemabo saru shilem melemtet, anungji ano June 3, 2017 nüa GST Council

senden ayonga amentsü.

Yashi GST Council senden nung items trok dak alaka tanünga items ajak atema GST rates latetogo.

Wheat aser jang densema menjang ajak nung jenjang ajema akumtsü, kechiyong item nungji GST saru malitsü. Tang state kari jang aser menjang nung Value Added Tax (VAT) saru agidar.

Yashi items 1,211 nungi items trok dak alaka tanünga items ajak nung saru latetogo.

Revenue Secretary Hashmukh Adhia-i ashiba agi, items shilem 7 nung saru magir aser items shilem 14 nung saru shilem 5 alitsü.

Ano items shilem 17 nung saru shilem 12, items shilem 43 nung saru shilem 18 aser items shilem 19 nung saru shilem 28 alitsü.

Telangana nung tali atsükba agi nisung 167 süogo

Hyderabad, May 19 (Agencies): Telangana nung tali atsükba ajanga taküm April ita nungi tenzüka tang tashi nung nisung 167 tashi asüba osang lir, ta tanü state disaster management nung tongti ketdangser kati metetdaksü.

Ajisüaka iba osangji jangjatsü atema, Mandal shia nungi tehsildar ka, police sub-inspector ka aser civil Surgeon ka adenba züngsem aseme

akümiba sorkar committee temi item osangji bushitsü.

"Tanü tashi nung asürtemji tali atsükba agi asü asü masüar ibaji jangjatsü atema item committee-i bushitsü. Iba sülen ang senotsü teyari agütsütsü. Asürtem asüba kuliji tang tebushidak lir," ta paisa ashi.

Tesüiba anogo ishika Telangana kanga tsüka kümogo aser tesem aika nung temperatures 40 degree

adenogo.

Meteorological Department-i ashiba agi, taruba anogo pongunü tashi ano Telangana nung tesem aika kanga tsüka akumtsü, aser state tesem ajaklen kanga shikonga alitsü.

State nung Bhadrachalam, Ramagundam aser Nalgonda kanga tatsükba liasü aser item tesem nungbo maximum temperature ji 46 degrees Celsius liasü.

Tanü Election Commission-i ECI aser EVMs amshia sayutsü

New Delhi, May 19 (Agencies): Honibarnü Delhi nung Election Commission of India (ECI)-i Electronic Voting Machines (EVMs) aser Voter Verifiable Paper Audit Trail System (VVPATs) amshia sayutsü.

EC-isa parnok indang electronic voting machines (EVMs) raksaa amshitsü atema yimtenren party tem ayongzüksü.

May 12 nü party ajak senden nung Chief Election Commissioner, Nasim Zaidi-i, tawa assembly election nung amshiba EVMs raksaa amshia sayutsü atema yimtenren party tem nem maongka agütsütsü, ta metetdaksa liasü.

2009 küm nunga Election Commission-i iba ama tayongzükba agüja linük tesem balala nungi EVMs 100 shi Vigyan Bhawan-i bener arua liasü.

Honibar nikongdang osangbenertem senden nungsa EVMs aser paper trail machines amshia sayutsü atema Commission-i sentong renema lir.

Party ajak senden nung party aikati, taruba nungibo election ajak nung paper trail

machine keta aliba EVMs amshitsüla, ta bangjema liasü.

BJP, CPI, CPI (M), AIADMK, DMK, NCP aser JD(U) party temi election nung paper trail machines keta aliba EVMs amshitsü melunger saka BSP, AAP aser Trinamool Congress party temibo paper ballot dang amshitsüla, ta akhanger.

Ano AAP-ibo EC dang, tawa agiba assembly election tem nung EVM raksaa amshir asü mamshi'ar ibaji jangjatsü atema Election Commission kübok party ajak nungi züngsemtemi akumba committee ka tentettsü atema takhangba agüja lir.

Election ajak nung Voter Verifiable Paper Audit Trail (VVPAT) keta aliba EVMs amshitsü atema takhangba agütsüba agizüka May 12 nü Election Commission of India (ECI)-i, item oset alitsü atema senotsü nguogo aser 2019 General Elections tashi nungbo item machine amshitsü, ta metetdaksa liasü.

EC-i mepishiba nung ajemdaker Union Cabinet-i VVPATs lakh 16 alitsü atema sen crore 3,200 jungnüa lemozüksüogo.



Ranchi (Jharkhand), May 19, 2017: Hokolbarnü Jharkhand nung auer teloki nisung asem khasetba sülen Garhwa district kübok Bishunpura tesem nung alirtemi tejashi nung garitem rongdoktsüba noksa nung angur.

Linük nung 'Swasth Bharat' nungdak: Sachin

New Delhi, May 19 (Agencies): Hokolbarnü New Delhi nung Sachin Tendulkar-i Ato Kilonser, Narendra Modi ajurua liasü, aser iba mapang nung pai, 'Swasth Bharat' dak alia linük nung 'Swasth Bharat-a ajungkettsütsü nungdak, kechiyong ibaji linük atema chichiba tashi asütsü, ta ashi.

Modi ajurua senden amenba sülen osangbener den jembidang Tendulkar-i, "Ni nisung ajak nem saisapong ka mesüra kabosa asayadaksüner. Asen linük nung Swasth Bharat alitsüji kanga tongtibang, aser iba atemaji ni-a ambassador rongnung ka lir, ajisüaka iba denji külemi asen linük nung lanur nütsüng jenti lir asünungji, asenoki Swasth Bharat indanga jembitsü nungdak. Ibiaja kasa tongtibang," ta ashi.

Nai 'Swasth Bharat'

ambassador ka shilem agitsü asü? ta asüngdangba langzüdang Tendulkar-i, "Atangji, ni iba shilemji agitsü. India linük temang anema lira, ibaji chichiba tashi asütsü, kechiyong nütsüng timbaka lanurtem lir, aser asenok anema alitsü nungdak. Lanur temang manemi aliba nütsüngji lendong lir," ta ashi.

Pai ashiba agi, temang arakzüa aliba ajanga anema alir aser mapa balala nunga nai alia inyaktettsü.

"Na saisaponger ka akumtsü menüngdak. Na doctor ka, engineer ka mesüra osangbener ka süaka, ajak anema alitsüji nungdak," ta paisa ashi.

Cricket asayar nungtugu, Tendulkar ya pa taküm otsü nung ajemdaker yangluba film "Sachin: A Billion Dreams" ajungkettsütsü atema New Delhi-i arua lir.



New Delhi, May 19, 2017: Anti-Terrorism Day atongtsü (May 21) anogo ana nung lia Hokolbarnü New Delhi nung Minister of State for Home Affairs, Kiren Rijju-i ketdangsa Ministry of Home Affairs aser Dept of Personnel & Training ketdangsertem aser staff tem tenangzükba agidaksüba noksa nung angur.



Nicosia, Cyprus nung Council of Europe nung Committee of Ministers senden ka amendang Cypriot President Nicos Anastasiades (tiyongtsü), Council of Europe Secretary General Thorbjørn Jagland (achiji) aser Cypriot Foreign Minister Ioannis Kasoulides nungertem külemi agiba noksa ka angur. (Nicosia, May 19)

Sweden-i Julian Assange bushisüngdangba anener

Stockholm/London, May 19 (Agencies): WikiLeaks tenzüker Julian Assange-i tetsür dak tashiyim agi shi nung medem ta tai tonglokba ken o Sweden ketdangsertemi bushisüngdanga aru saka parnoki Hokolbarnü iba ken o bushiba anener ta metetdaksü. Ajisiüaka, British police-ibo Assange-i London nung aliba Ecuadorean embassy toktsüra pa aputsü ta ashir. Pa iba embassy nung küm 5 tashi jenoker liyonga arur.

Arishi küm 45 tain Assange-i June 2012 nung embassy nung jenok. Assange-i tashiyim agi shi nung medem aser tim mesüi kongshi ta tetsür anati ken o benokba sülen Assange-i Ecuadorean embassy nung jenok. Pa Sweden-i anir moudaktsüsi atema iba mapa ya inyak.

Sweden-i pa pur United States ket nung WikiLeaks ken o atema agütsüsü ta Assange-i tsübuu bilem.

Hokolbarnü Assange-i Twitter ajanga, pa tak tai tongloktsürtem nem tatok magütsüsü ta metetdaksüogo. "Küm 7 tashi kuli kecha melii tepuokdak ayu. Ozü tanurtem ni melii indaktsü aser kü tenüing sensamasatsü. Ni tatok magütsüsü aser kodanga mamatsü" ta Assange-i ashi.

Ozüng tsütsü tetsükdaktsü ajuruba agi bushisüngdang mapa meinyakteter, ta Swedish Chief Prosecutor Marianne Ny-i metetdaksü. "Pai aibelenba indang onoki kechia meshiteter saka 2020 tashi nung iba ken o angadangtsü mapang metembang dang Assange Sweden-i arura, onoki iba ken o tanaben lapokba bushisüngdangtsü akok" ta Ny-isa ashi.

London nung police-i shiba agi, Assange-i embassy toktsüra pai bail alema inyakba atema tai tonglokja aputsü. Tetsür dak tashiyim amshia

shi nung medemba ken o dang nungiba iba onük tilaba lir, saka pa aitsüra, küm ka shi tepuokdak ayutsü akok, ta police-isa ashi.

Assange-i sorkar tashiyim mapatem inyakba yimjak nung metetdaksüba aser tebilemba jembitsü temeten atema inyakba atema nisung aikati paji 'cyber hero' ka ama züngshir, saka ano aikati pa ya ozüng alema inyaker ka aser West indang security ajembanger ka ta ashir.

Tesüiba mapang computer hacker Assange-i U.S. diplomatic cables miim osang aika jungkai adoka metetdaksüsi aser onüktem rongnung Russian President Vladimir Putin nungi tenzüker Saudi royal family tashi liasü.

Sweden nung pai tetsür dak tashiyim mapa inyak ta tai tongloktsüba tiyazü aser pa agütsüsü atema inyakba mapa ka dang lir, ta Assane-i shiyonga arur.

Sudan president-i Islamic Summit nung madentsü

Cairo, May 19 (Agencies): Saudi Arabia nung agitsü aliba Islamic Summit nung Sudan President Omar al-Bashir madentsü ta Sudan ketdangsertemi metetdaksü.

Iba sentong nung US President Donald Trump-i tetushi süa jaoker ama shilem agitsü.

International Criminal Court-ia Sudan President al-Bashir-i 'war crimes' inyak ta ken o

benoka lir. Deobarnü amungtsü aliba summit nung al-Bashir-i pa medentetsü ta Hokolbarnü osang metetdaksü, ta SUNA news agency ajanga ashi.

Riyadh nung amungtsü aliba summit nung Muslim lenir 50 den tema adentsü imlar aser iba sentong nung Al-Bashir adentsü jaokba atema US ketdangsertemi ashishitep ta osang angazüker.

1989 nungi al-Bashir-i Sudan linük yimsü süa arur aser Sudan kübok Darfur region nung meimchir anema mapa inyakba aser 'war crimes' menaba atema ICC-i pa anema ken o benoka lir.

Tesüiba küm 10 tsüngda Sudan nung mepetmesü adoka rara nung nisung 300,000 shi taküm samaogo, ta UN-i asadangtetba osang ka metetdaksüogo.



May 19, 2017 nü Germany yimtiba Berlin nung G20 health minister tem senden nung German Chancellor Angela Merkel külemi agiba noksa ka angur.

Ivanka Trump-i tebu meina senzüsü

Washington, May 19 (Agencies): Ivanka Trump-i tebu Donald Trump den külemi Saudi Arabia, Israel aser Italy semdangtsü, ta White House ketdangser kati ashi.

President Donald Trump atema senior adviser kati ashiba agi, anogo 9 nü atema Trump-i ainlen senzüdang Ivanka-ia anogo troknü pa den senzüsü.

Saudi Arabia nung Ivanka Trump-i Saudi tsürtem den tetsür dak sendakba rongsenkettsüng onüktem lemsateptsü. Iba linük nung tetsürtemi ajuruba tayongzükbatem aser parnok renloka aoba indang osangtem lia metetpelatsü, ta ketdangserisa ashi.

Israel nung Ivanka-i tebu Trump den külemi Western Wall semdangtsü. Ivanka ya Jared Kushner den kibong aküm aser iba sülen la Judaism-i melena liasü.

Rome nunga lai, Community of Sant'Egidio den nisung shibelenba indang onüktem lemsateptsü.

Community of Sant'Egidio ya aid group ka lir aser Vatican den sendaktepa lir. Laisa Pope den ajurutepba senden ka nung adentsü.

US President Donald Trump atemabo tang ya mezüngbuba international trip lir saka par jala Ivanka-i taküm April ita Germany nung tetsür shishilembar indang mungdang ka nung denogo.

Afghan tsürtemi TV Station ka tenzüksü



Afghanistan yimtiba Kabul nung arishi küm 23 tain Krishma Naz (temalen)-i Zan TV atema la indnag programme tangokdang agiba aser tsünglanglen TV station nung tetsürtemi mapa inyakba noksa nung angur.

Kabul, May 19 (Agencies): Afghanistan nung tetsür nem bendanga agütsüba TV channel tasen ka tenzüksü aser iba ya media industry nung tang mezüngbuba asütsü.

Zan TV (Women's TV) ji Deobarnü sayatsü aser iba channel nung staff ajakji tetsürtem dang lir.

Afghan channel tem nung osang azünger tetsürtem lir saka tetsürtemi dang ketdangtsüba channel ji mapa tajung ka lir.

"Iba TV station ya tetsürtem atema dang lapoktsüba atema ni kanga pelar, kechiyong asen loktiliba nung pei temeten memetetba tetsürtem aika lir" ta arishi küm 20 tain Khatira Ahmadi-i ashi. La ya Zan TV nung producer ka lir.

"Iba station ya tetsürtem atema aser onoki tetsürtem atema inyaktsü" ta laisa ashi.

2001 küm Afghanistan nungi Taliban atsüngdokba sülen linük nung tetsür temeten aser kakat shisatsü bushitsü maongka anguba ya sorkar aser foreign

aid organization temi teti jembia arur.

Ajisüaka, media tsütsü tetsürtem atema alitsü tasak linüktem rongnung Afghanistan ya ka lir.

Zan TV tenzüker aser media entrepreneur, Hamid Samar-i ashiba agi, Kabul ama yimti tulutem nung tetsürtem atsür arutsü atema channel lapoker.

"Tetsür temeten aser media temeten indang jembia arur saka asenoki tetsür asoshi mapa balaka inyakba mongudang aser iba jagi onoki Zan TV tenzüker" ta paisa metetdaksü.

Zan TV ya low-cost digital technology amshia tenzüker aser Kabul nung basic studio ka nungi dang inyaker.

Parnoki talk shows den temang anema alibaren aser kentenba nung temulung agütsür.

Iba channel nung aiürtem teimba lir aser kakatshirtem aika lir. TV Station nung graphics, camera operation aser editing atema tebur 16 shi lir.

Kohima police-i sen 7,00,000 jenjang ganja apu



Kohima, May 19 (TYO): check gate anüker Kohima Khuzama Inter-State police Police-i gari sota mita

reprangdang Chevrolet Sail gari registration number NL07C-8600 nungi National market nung sen 7,00,000 jenjang ganja seret 140 puogo, ta tanü Sub-Divisional Police Officer (South) & PRO Kohima, Nagaland, Atu Zumvü NPS-i sangdong ka ajanga metetdaksü.

Iba dak sendakba nung Manipur, Senapati district kübok Tungam Afu yim nungi Baole'er jabaso arishi küm 21, B. Paona puogo aser maneni bushisüngdangtsü atema Khuzama Police Station nung ken o ka benokogo, ta kasa sangdong nungsa shia lir.

GST saru shilem 18 latettsüba agi Telecom sector mepelar

New Delhi, May 19 (Agencies): Telecom nung Goods and Services Tax (GST) rates shilem 18 dak tema agitsü lemtetba atema mepelai Hokolbarnü Telecom Industry-i, tang telecom sector nung senotsü jenjang mejungi lir, ano tamajungba akumtsü, ta metetdaksü.

Hokolbarnü GST Council senden nung healthcare aser educational services dak alaka service balala atema rate pezü-saru shilem 5, 12, 18 aser shilem 28 meshitsü lemtetogo.

Iba osang sangdongba sülen

Cellular Operators' Association of India (COAI) Director General, Rajan S Mathews-i, "Telecom industry-i GST pelaa agizüker, saka saru shilem 18 sangdongba agi onok mepelar. Tang telecom sector nung senotsü jenjang mejungi aliba nung ajemdaker onoki sorkar dang, tang saru shilem 15 aliba dang nungi saru tali kümra nübur atema telecom services jenjang tasakba akumtsü ta shiogo," ta metetdaksü.

Paisa, "Iba ya ajanga Telecom industry nung tang khuret aliba dang nungi ano

khuret tuluba akumtsü. Iba ya ajanga linük tesem ajaklen telecom terenlok atema sentong asameyanga aliba jenjang raksatsü aser Digital India, cashless India ama sorkar mapatongtem nunga mejungi kongshitsü," ta ashi.

"Nüngdakba service ka ama telecom industry-ia tajanzük terabo nüngdaker aser service tajungtuba agütsütetsü atema saru ajemtsü nüngdaker. Industry-i anibelem arema kanga meranga inyaker aser omen nung aliba ama ajak sendaktepdaksür," ta Mathews-isa shisem.

UP nung Dalit kibong 180-i Buddhist... (TAPAK 1 NUNGI...)

Saharanpur nung olulu aser telok balala tsüingda mepetmesü adokdaksüsa osang belenshiba atema Facebook aser WhatsApp account administrator tem anema FIR 10 benoka lir, ta paisa shisem.

Facebook aser WhatsApp account administrator temji teimbaka Bhim Army

züngsemtem lir. Saharanpur police-isa tanga ken o balala nung nisung 36 pua lir.

Tesüiba hopta tsüingda Saharanpur nung ki 25 den gari 23 rongdoktsü aser bus gari aika raksaja liasü.

BhimArmy ta ajaba telok ya küm ana tejaklen social media nung tentetba lir. Mapang

tatsüka tsüingda, UP nung Dalit nung meyirjang aika iba telok nung denogo aser ano linük nung Dalit nungertemi iba Ambedkarite politics yimya tasenba ya sapua agizüker.

Uttar Pradesh nung Bhim Army nung Dalit nung 40,000 dak tema züngsema lir aser state adena rashia odar.

Tashiyim mapaji lumiba aser ... (TAPAK 1 NUNGI...)

Ano nisung ajaki asenok koba tesem nung alir, yangji asen electoral roll nung tenüing ayutsüla kechiaser jila balala nung alirtem yimtak oa takok toktepa inyakdang aiben yimtak rongrong adoker aser küm aika yimer tsüingda tsukjitep atoker ta jembi. Ano memetetba nübu ajanga tashiyim amshiba ajanga tai

maket nisung timtimdaksüba to joko tang yongi khenyongi nokdangtsü asoshi yimten aser arogoi noktaksüla ta sensakasem. Arogo aser yimtenji apuani ama lir, anungji alima ajungtsu asoshi mapa ajak nung kulemi teka amtepa aruya aliba election mapangbo akhi ama mesüi temelenshi lia agitettsüsa inyakdi ta

ajungshitepa iba sentong tempang.

Iba sentong nung Impur nungi Social Action Committee züngsem den ABAM nung Media & Social Concern Coorinator, Wb.Limasangwa dena shilem agia liasü.

Iba kasa sentong ya ano Kobulong nung May 23 nü alitsü.

KÜM 80 AJUNGBA TEPELA TASOBA ANOGO



MRS. I. TEMSÜLA (KHAR)
20-05-2017

Temeim Oja, na Tsüngremer arishi küm 80 tashi toktsübayong Tsüngrem tenüing asanger. Ano maneni Tsüngremi arishi talang den anema yujang ta sarasademtsür.

- Temeim Kinüingbo, Chirnurtem, Semchirtem & Anükapang.



OFFICE OF THE
Dimapur KANGTSUNG SENSO TELONGJEM
Dimapur - 797112 : Nagaland

TETUSHI AGÜTSÜR

Sorkar tenzükba mapa nung bendanga agüja aser meranga inyakba ajanga Er. B. IMTI AO, S/O. Lt. Benzujungba Longkumer, Superintending Engineer (Power Department, Govt. of Nagaland) jenjang tongteta Sensosanger ajak dangi konang tulu bener arutsü nung Dimapur Kangtsung Senso Telongjem ajanga pelaba den tetushi tulu agütsür.

Tsüngremer taochi nung nü mapa aser tenzükba ajak nung Pa leniba, temoatsü aser takokba nung aniangma ta asen Sensosanger ajaki sarasademtsür.

Sd/-
ALEM PONGENER
Secretary
DKST

Sd/-
J. ANUNG JAMIR
President
DKST

Career Guidance Seminar

Theme:
Building on Excellence
Organised by:
AKM, Divine Bridge Ministries,
Dimapur & Kohima Ao Students Union.

Resource Persons:

1. Dr. Jamedi Longkumer, Assistant Professor, Dmp Govt. college.
2. Miss Aotula T Imchen, IPS, Dimapur Police Commissionerate.
3. Dr. S.K. Chauhan, Director, Alpine Institute Of Management and Technology, Dehradun.
4. Er. N. Yanger pongen
5. Er. Asangba Pongen
6. Mr. Supongchiten, Director, Divine Bridge Ministries, Delhi.

Date: 17th May. Mokochung Venue: Longkumer Kilem, Mokochung
19th May: Kohima Hotel Ura, Raj Bhavan Road, Kohima
20th May: Dimapur DABA Main Church, Dimapur
Time: 11:00 Am Mokochung
1:00 pm Kohima
11:00 Am Dimapur

This seminar aims to guide students and their parents in making decision on the best career option. The main highlights include career planning, selecting courses and institutions and financial assistance. There will be a counseling session after the seminar and direct admission will be given in various courses like engineering, architecture, horticulture, agriculture, forestry, nursing, pharmacy, management etc. Students who have completed their 10+2 (Arts, science, commerce) exam are cordially invited to attend the seminar along with their parents. Students are requested to bring the photocopies of their class 10 & 12 documents along with their passport.

For More Information Contact: +918700695549 MKG, +918014650167 DMP, +918259825908 KHM

GOVERNMENT OF NAGALAND DEPARTMENT OF SCHOOL EDUCATION

NOTICE

NO. ED/Act/Monitoring-1/2013

Dated Kohima, the 19th of May, 2017

Employees of the School Education Department who had failed to show up during the time of GPS survey at their respective establishments are hereby informed that verification of absentees will be done from the 22d May to 26th May 2017 in the Directorate as part of the GPS Survey of all Government Schools in Nagaland and Verification of information of all its Staff and Teachers under the Department. The following documents are to be produced at the time of verification.

- * 1 no. Colour Passport Photo
- * Government issued ID Card/ Passport/ Voters ID Card (Any one)
- * PAN Card/ AADHAAR Card
- * Appointment Order
- * Matric (HSLC) Admit Card

Those employees who had failed to show up during the survey at their posting places are directed to bring valid reasons for their absence during the verification.

(SMITA SARANGI) IAS
PRINCIPAL DIRECTOR

Issued by: DIPR

Tanü lanurtem aika parnok tazüingba lenmangtem nung aibelena aoba aser lenmang tai shimba, institution, colleges tem tai nung azüingba aser wrong information agüja free education mesüra admission aser scholarship tenüing amer student aser tsüraburtem aika ashiochtsür iba den ano kaketshirtem aika züingnüaka lenmang shidak mongutetba agi parnok tia raksaba aika ajurua tatem nung parnok taküm rongsen amajok nung atemer. Anungji lanurtem parnok tazüingba leman balala nung yaritsü asoshi AKM, DBM, KAST & DAST longjemer iba Career Guidance Seminar ya ayonger. Iba sentong nung adentsü tsürabur aser student class 12 pass sür alirtem (Arts, Science & Commerce) ajak arua adentsü metetdaksür. Seminar temer külen Counselling mapang alitsü. Iba mapang temulonger aser tejangrar student tem asoshi course balala (Engineering, Architecture, Agri, Forestry, Horti, nursing, B.Pharm, BPT, Hotel management, Fine Art, law etc. nung direct admission agütsütsü. Anungji class 10 aser 12 indang documents photo copy den noksa bener arutsü metetdaksür.



New Delhi, May 19 : Hokulbarnü Inner Circle of Cannauh Place, New Delhi nung Minister of State for Youth Affairs & Sports (I/C), Water Resources, River Development & Ganga Rejuvenation, Vijay Goel aser Manipur Chief Minister, N Biren Singh nunger temi FIFA Under-17 World Cup ajungkettsü asoshi Football Balloon sayaba mapang tangokba noksa nung angur.

Philipp Lahm aser Xabi Alonso na Bayern Munich nung tatempan asayatsü



na ya Bayern Munich telok nung tongti teret ka ama asaya aruogo aser tenati takok marok aika ngutetogo. Alonso ya Liverpool, Real Madrid aser Bayern Munich telok nungi kanga junga asaya

Munich, May 19 (Agencies): Bayern Munich telok nungi asayar mongin ana, Philipp Laha aser Xabi Alonso na Honibarnü tatempan asayatsü.

Iba asaya temapngba sülen Bayern teloki Bundesliga takoker marok atonga ponguben ajungkettsü.

Arishi küm 33 tain, Lahm aser arishi küm 35 tain, Alonsa-

2010 FIFA World Cup South Africa nung asayadang Spain-i alima nung football asaya tulutiba ya akok aser iba mapang Alonso-i kanga tongti shilem agia asaya-a liasü. Alonso ya international level nung Spain nungi 114 ben asayaogo. Philipp Lahm ya arishi küm

India U-17 football team-i Italy madak 2-0 agi takok angu

Arizo, May 19 (Agencies): Indian U-17 football team-i Arizo, Italy nung Italian U-17 football team den friendly asayaba nung India teloki goal ana agütsü saka Italy teloki goal kata mükepzüktet. FIFA U-17 World Cup October nung asayatsü renemshiba mapang

Europe nung India nunger telok asaya senzüba nung Italy ya mezüng akoker asütsü. India nunger Abhijit Sarkar-i asaya tenzüker minute 31 buba nung mezüng goal agütsü. India nunger telok-i maneni goal agütsütsü merang, saka Italy teloki kanga junga nokdangteta

mezüng asaya tempang. Tanabuba asaya tenzükb nunga yamaji India nunger-i goal agütsütsü maongka aiben angu saka iba maongka parnoki magitet. Iba asaya tembangtsü minute 10 lia India nunger Rahul-i goal ka agütsüset.

Italian Open nung Zverev Semi-final tongogo, Nadal tsük



Rome, May 19 (Agencies): German nunger Alexander Zverev-i mezüngbuba ATP Masters 1000 semi-final tongogo. Pai World No. 6, Milos Raonic madak 7-6(4), 6-1 agi takok angu.

Arishi küm 20 tain, Zverev-i Semi-final nung America nunger John Isner ajurutsü. Isner-i quarter nung Croatia

nunger Marin Cilic madak 7-6(3), 2-6, 7-6(2) agi takok angu. "Ni tanü kanga junga asaya amai bilemer. Ni semi tongtetba atema kanga pelar aser asüng John den asayatsü, aser pa ya ni Saddlebrook (Florida) mapang nungi meteta lir. Iba asaya kanga tajung asütsü," ta Zverev-i ashi.

Isner-i quarter nung Cilic den asayadang aces 21 agütsü aser Andy Roddick-i 2008 küm tongtetba sülen America nungeri Rome Masters semi tongtetba ya Isner ya mezüng alitsü. Austria nunger Dominic Thiem-i Rome Masters nungi Rafael Nadal Hokulbarnü tsükdaktsüogo. Dominic-i 6-4, 6-3 agi Nadal madak takok ngua Spain nungba asaya 17 tashi takok nung aruba temapngtsüogo. Italian Open 7ben koka alisang, Nadal-i taoba hopta Madrid Open final nung Thiem madak takok ngua liasü. Saka Thiem-i Rome Masters nung iba mangyang kanga junga agiogo.

MAY 21, 2017 ASAYA
-----FINAL-----
IPL 2017 **MUMBAI INDIANS** VS **KOLKATA KNIGHT RIDERS**
8:00 PM
MAY 19, 2017 ASAYA OSANG
Mumbai-i wickets 6 agi Kolkata akok

Mumbai-i wicket 6 agi Kolkata madak takok angu, Pune den final asayatsü

Bengaluru, May 19 (Agencies): Hokulbar aonung Mumbai Indians-i wicket 6 agi over 14.3 buba nung Kolkata Knight Riders madak takok ngua Indian Premier League (IPL) final tongtetogo.

Kolkata teloki run 107 ngutet aser Mumbai teloki iba runs meneptsü merangdang wicket asem tashi kanga keraa out asü, saka Rohit Sharma aser Krunal Pandya nati kanga junga asayaba ajanga par telok takoker rongnung aten.

Krunal Pandya (45 not out) ya Mumbai telok nungi run timba nguteter liasü. Kolkata telok nungi Piyush Chawla-i wicket timba agitet. Pai over pezü nung run 34 agütsü aser wicket ana agitet. IPL 2017



2017, May 19: 2017 IPL Qualifier 2 nung Mumbai Indians aser Kolkata Knight Riders asayaba mapang Mumbai Indians nungi Krunal Pandya-i takok run agiteter pelaba noksa nung angur.

Final ya Mumbai Indians aser Rising Pune Supergiants tsüngta Hyderabad nung May 21-nü asayatsü.

MORNING PREMIER LEAGUE 2017 TABLE

	PLD	W	D	L	GF	GA	GD	PTS	
1	ALL BLACKS	11	9	1	1	35	21	+14	28
2	POWER COMM FC	11	8	0	3	41	19	+22	24
3	MEDICAL XI	11	7	1	3	39	30	+9	22
4	AMJUR FALCON FC	11	6	0	5	36	22	+14	18
5	MERHULIETA FC	11	6	0	5	37	40	-3	18
6	MORUNG UNITED FC	11	5	2	4	28	22	+6	17
7	MRH SUNRISERS	11	4	1	6	21	32	-11	13
8	MORNING FC	11	3	2	6	36	35	+1	11
9	MUSTANG FC	11	2	2	7	19	26	-7	8
10	SILVER WHITE	11	0	1	10	16	61	-45	1

EVERYONE FEELS THE PAIN!

Oajm
FAST RELIEF FROM PAIN

A Product of LIVSAV Group
CUSTOMER CARE- 0250-6580183

BIEMDANGANG
"Nai nü taküm meimra amajok nung mapang teindok"